

PRISM

(People's Right to Information and Development Implementing Society of Mizoram)
INFORMA, V – 27/C, Venghlui, Aizawl – 796 001

Postal Address :

PO Box – 111,

Aizawl, Mizoram

Website: www.myprism.org



Regd. MSR - 96

Phone: 389-2300375(O)

President - 9863373928

Gen. Secy- 9862335079

Treasurer - 9436146978

No. Prism Booklet 8

Date : 11.12.2009

INTERNATIONAL ANTI CORRUPTION DAY IN MIZORAM

(Report of first observation of International Anti-Corruption Day
in Mizoram on 9th December, 2009)

International Anti-Corruption Day hman a ni

December 9, 2009 khan Aizawl-ah PRISM huaihawtin nasa taka 'International Anti-Corruption Day' hman a ni.

He 'International Anti-Corruption Day' pual hian PRISM chuan chi 6 laiin hun kan hmang a. He ni hmanna hi Mizorama a vawi khatna niin ni pual bika hetiang nasaa hun hman hi Mizoramah a la awm lo hial mai thei a. Hetiang hi he ni hman dan report tlangpui chu a ni:

Newspaper Article:

He 'International Anti-Corruption Day' pual hian kan President Pu Vanlalruata'n article a ziak a, Vanglaini Newspaper leh chanchinbu hrang hrangah December 9 hian chhuah a ni. (Full text in Annexure I)

Radio Speech:

Zing dar 6.05-ah kan President Pu Vanlalruata chuan 'International Anti-Corruption Day' pual thuchah All India Radio, Aizawl Station-ah a sawi a. Corruption in khawvel a tihbui dan leh tunlaia dona chungchang te, corruption pawizia leh do a tulzia te a sawi a ni. (Full text in Annexure II)

College Level Elocution Competition:

Zing dar 9:45 – 10:45 chungin I&PR Auditorium-ah College Level Elocution Competition neih niin College panga- Govt. Hrangbana College, Govt. Aizawl College, Govt. Johnason College, Govt. Aizawl North College leh Apollo School of Nursing atang tein naupang 10 in competition hi an bei a ni.

Competition programme hi PRISM Vice President Pu Lalthuamlia'n hneh takin a kaihrui a, result puan nghal a ni.

He Competition-ah hian Certificate leh Prize money siam niin First Prize – Rs 2,000.00, Second Prize – Rs 1,500.00, Third Prize Rs 1,000.00, Consolation Prize panga – Rs 500.00 theuh leh Participation Prize – Rs 300.00 theuh awmin Prize money belkhawm hi Rs 7,600.00 a ni.

International Anti-Corruption Day 2009 Report

Judge pahnih Pu Robert Lalchhuana, Journalist leh Pi Lalnipuii, Social worker ten uluk takin an endik a. Lawmman pakhatna atanga pathumna thlenga dawngtu te chu heng mi te hi an ni:

- First Prize Winner : JH Lalmawizuala S/o JH Hmingthanchuanga
Govt. Hrangbana College
- Second Prize Winner : Lalfakzuala S/o Rolenga
Govt. Aizawl North College
- Third Prize Winner : Zoramthanpuia S/o H Ramngaihzuala
Govt. Hrangbana College

Observation of International Anti Corruption Day:

Dar 11:00am – 1:00pm-ah I & PR Auditorium-ah Mizoram Governor hovin he ni pual inkhawm pui ber neih a ni.

He hun hi Pu Denghnuana IAS (Rtd.) in kaihruaiin dar 11:00am-ah khuallian Governor Pu MM Lakhera lo thlengin National Anthem sak hnuah leh Chief Vigilance Officer Pu Vanhela Pachuau te nen chair-ah an thu a. Chairman chuan Governor hi function hawng turin a sawm nghal a ni.

Governor chuan thu sawiin PRISM in Mizorama 'International Anti-Corruption Day' hman chhuah anih theihnana hma kan lakna fakin corruption do tul zia a sawi a. Mizoram budget chu mihring cheng zawng zawngin insem pawha Rs 2,500 lai tling thei anih laia hnathawh hmuh tur duh anga a awm si loh dan te, hemi hian corruption tam zia a lantir chian hle thu te a sawi a. Corruption do tura chhungkua atanga bul tan theih a nih dan sawiin hlawh aia tam pawisa hawn te hi khawi ami nge anih inzawh thin a that dan leh chumiin corruption a tihtawp theih dan te a sawi a. "Contract work-ah a thawktu hming leh estimate zat te, leh thawh hun chhung tur te ziah a ni a, thawh hun chhung tura an thawh zawh loh te hian a chhan I zawt thin ang u" a ti a ni.

Hemi hnu hian Chief Vigilance Officer Pu Vanhela Pachuau, Chief Secretary ni bawh chuan thu sawiin corruption hi kan duh tlan em avanga do a harsat dan te, corruption pawizia leh tihrem a tulzia te a sawi a. Sorkar hnathawk leh mi dang zawng zawng pawhin sorkar kalphung leh Conduct Rules hriat chian a tul dan te, chu chu corruption do nana hmanraw pawimawh tak anih theih dan te a sawi a. Bank loan rulh that pawimawh dan asawi uar hle a ni.

PRISM President Pu Vanlalruata'n Keynote address sawiin "Corruption tih tawngkam hi kan hman lar viau laiin Mizo tawnga a tlukpui kan nei hauh lo hi thil chhuanawm tawpkhawk a ni a. Hei hian Mizo te hi hnam rinawm tak kan ni a, engemaw avangin corruption hian min tibuai rih mai mai a, kan hnam nun atang hian kan la paihbo leh thei ang tih a tilang chiang viauin kan hria" a ti a. "Corruption tihbo nana hmanraw tha ber tura ngaih chu transparency leh accountability neih a ni a. Tihhlawhtlinna atana tangkai ber tur erawh chu political will nia ngaih a ni thung" tiin political party aiawh te thusawi atanga political will dinhmun hriat theih a beisei thu sawiin party aiawha thu sawi tur te a cho a ni. (Full Text in Annexure III)

International Anti-Corruption Day 2009 Report

Hemi hnu hian political party pathum – Mizoram Peoples Conference, Mizoram Pradesh Congress Committee leh Zoram Nationalist Party aiawh ten thu an sawi a. Mizo National Front Party erawh chuan aiawh an rawn tir lo a.

Party aiawh thusawi zawh hian Pu Vara Hmar, Sr. Lecturer (Rtd.) in thu sawiin corruption tibo tura kawng dang awm theia a ngaih loh thu leh tawngtai chiah tih theih nia a ngaih thu a sawi a, "Eiruk tam dan indawta nitin thi turin Kohhran tinah tawngtai rual mai ang u," a ti a ni.

Seminar on Corruption

Chawhnu dar 1.30-a tanin I & PR Auditorium-ah vek hian Seminar neih zui a ni a. Prism Vice President (Sr) Lalrinzuala Chawngthu in a kaihruai a ni.

Seminar-ah hian Resouce Person pali- Dr. JV Nunchunga, Rev. Rosiamliana Tochhawng, Lallianchhunga leh KL Liana te an awm a. Zau taka sawiho zui niin kham lo taka tin a ni. He Seminar-a paper zirho te chu Annexrure – IV series-ah a awm a ni.

Television Talk:

Hemi zan hian dar 6.29-a tanin Doordarshan Kendra, Aizawl-ah kan hruihu 5 – Pu Vanlalruata, President; Lalrinzuala Chawngthu, Vice President (Sr); Pu Lalthuamlia, Vice President; Pu HK Liansawta, Treasurer leh Pu RL Liantluanga, General Secretary ten discussion programme an nei bawk a ni. (Full script in Annexure V)

Sorkar thuchhuah:

International Anti-Corruption Day hman dan hi sorkar Press Release-ah chhuah a ni. (Full text in Annexure VI)

Annexures:

Annexure - I

CORRUPTION I DO ANG U

- Vanlalruata, President, PRISM

Corruption hian ram hmasawna a timuang a, ram chung mihring zingah inrinhlelh tawna a thlen a, politic khelphung a ti chhia a, chatuan hremhmunah mi tam tak a hnuk lut a, mi rethei leh hausa kar a tizau mai ni lovin dik lo taka hausa te chu an hausakna leh thuneihna hum zui nan hmanraw chhe ber thlengin a hman tir thei a, a lehlamah mi rethei te chu hmanraw chhe ber hmanga mi hausa te tihchhiat tumah a siam thei bawk a. Chutiang a nghawng chhuah chinah chuan a sawp chu nasa tak a ni tih thin khawvel ram hrang hrang leh India ram state thenkhat te chanchinah chiang takin kan hmu thei a. Chuvang chuan khawvelin a buaipui a. Mahni theihna zawn theuh atangin kan zavaiin i do ang u.

December ni 9 hi kum 2003-a Mexico rama Merida-a UN General Assembly chuan resolution 58/4 of 31 October 2003 hmangin International Anti Corruption Day atan a puang a. He Resolution vek hmang hian khawvel huapa Dan tlawh-

International Anti-Corruption Day 2009 Report

chhan neia corruption dona kawnga hnathawk thei tur hmasa ber United Nations Convention against Corruption (UNCAC) din a ni bawk a. He ni hi corruption leh UNCAC chungchang awareness tihsan nana hman tura tih a ni.

General Assembly chuan a member ram leh regional economic integration organizations te chu he Convention hi pawm (ratify)-a hming ziahnhan (sign) vek turin a duh a. December 9, 2003 atang khan hming ziahnhan tan theih a ni a. July 23, 2009 thleng khan hming ziahnhan (signatory) 140 awm tawhin India pawh a tel a. September 8, 2009 thleng khan hming ziahnhan zinga 137 chuan pawm (ratify) tawhin India erawh chu a tel ve lo a ni.

International Anti-Corruption Day-ah hian ram hruaitu te, political party hruaitu te, sorkar mi pawimawh te, sorkar pawm pawl ten corruption chungchang leh corruption dona chungchang-ah hma an la ho thin a. Corruption Do Pawl te chuan chak zawka corruption do nana hma lain chi hrang hrangin hun an hmang thin a ni.

Corruption tih tawngkam hi kan hman lar viau laiin Mizo tawnga a tlukpui kan nei hauh lo hi thil chhuanawm tak a ni a. Mi thenkhatin, "Japan ho chu an taima lutuk a, an tawngah hunawl sawina a awm lo," an tih thin ai mah hian 'kan tawnga corruption sawina awm lo hi a chhuanawm zawk' hialin ka hria a. Hei hian Mizo te hi hnam rinawm tak kan ni a, engemaw avangin corruption hian min tibuai rih mai mai a, kan hnam nun atang hian kan la paihbo leh thei ang tih a tilang chiang viauin ka hria.

Presbyterian Church Synod in 'Corruption Do Kum' a puan lai khan Mizo te hian corruption kan lo inhrilhiah siak tawh a. A corruption aia a hrilhiahna kan buaipui avangin kha hun tha tak kha awmze nei mang lovah kan lo chhuah tawh a. Tunlai thleng hian mi thenkhat chu a hrilhiah lamah kan la inhambuai reng a, hei hi ngaihtuah chian loh vang niin a lang.

UNODC buatsaih- '**The Global Programme against Corruption – UN Anti-Corruption Toolkit**'-ah chuan khawvel pum pawm tlan theih corruption hrilhiahna a awm loh thu leh United Nations Convention Against Corruption in corruption hrilhiah tul a tih loh thu leh corruption huam thil hrang hrang ziahchhuah mai tha a tih thu tarlan a ni a. He thu hi pawm mai a, ram hmasawna tithuanawp thei corruption dona lama insawrbing mai hi a finthlakin a lang a. Corruption hian – diklo taka induhsakna te, thamna pek leh dawn te, chanvo leh hna pek dawna thil phut chhuah te, mahni emaw duhsak zawngte emaw hlawk nana midang chanai pawh pen te, inthlan laia pawisa hmanga vote lei te, vantlang thil chhehrelh te, mipui pawisa chhehrelh te, hnathawh tur ruahman aia chhiaa hnathawh te huam vekin- 'sorkarin mipui tana tha tura ruahmanna a siam tihhlawhtlinna kawnga Dan kal pela thiltih zawng zawng a huam vek' a ni.

Corruption chungchangah hian boruak a inthlakthleng nasa hle a. Kum sawm vel kalta te kha chuan corruption hi kan sawi sep sep ngam chauh kha a ni a, tunah erawh chuan langsar takin khawvel ram tinah kan do ngam ta a. Mizoramah pawh a ruka kan sawi sep sep thin kha kum 2006 atang khan langsar takin do a ni ta a. Corruption dotu pawl engemaw zat piangin chung pawl te hmalakna chuan nghawng thui tak a nei tawh a. Kumin 2009 kum laihawl vel atanga corruption dotu te do let tu pawl leh mimal lo awm ta hian corruption dona in nghawng a neih thui tawh zia chu a tilang chiang hle a. Corruption dotu te hma-

International Anti-Corruption Day 2009 Report

lakna avanga mipui sum chingpen tur fel taka kal leh ta te, pawisa kawngbo tawh a nihna taka hman theih tura lo chhuak leh te, leh corruption avanga Dan hmanga man hial te pawh hmuh tur an awm ta a ni. Hetianga corruption dona leh duhlohna pung zel hian corruption pawh a tihlem zel avangin a dona leh duhlohna hi uar zawka kalpui zel a ngai a ni.

Corruption nghawng hi zau pui puiin kawng li- political, economic, social leh environmental ti tein a thliar hlawk theih a. Politic khelhnaa corruption hian democracy leh Dan kenkawnna a tichhia a, ram hruaitu tha kan neih theih loh phah thin a. Economy lama en chuan corruption hian ram leh a chhunga chengte a tirethei tial tial a, mipui leh ram tana sorkar ruahmanna lian pui pui a tihlawhchham thin a, sumdawnnaah rinawmlohna hring chhuakin inbumna ramah a ram chu a chantir thin a. Mipui vantlang nun (social)-a a nghawng hi rapthlak berin mipuiin ram hruaitu leh sorkar an ring ngam lo mai ni lovin mi zawng zawng inrinhlehtawnna a thlen thin a, chu chuan hnam inlungualna tichhiain intih tel telna a hring a, a tawpah pheh chuan thisen hial a luntir fo a. Project lian pui pui ruahman leh thawka tihlawhtling si lovin awmze nei lovin kan chenna leilung leh thing leh mau nasa taka tihchereu a ni thinin kan environment in nasa takin a chhiatphah thin a ni.

Mi pakhatin corruption a tih hi ram tan a pawh thui thei hle a. Kan kawngpui tha tak neih tur enkawltu tu in emaw corruption a tih avangin mipui nuai telin kawngpui chhe tak neih phahin kum tam tak hrehawm kan tuar phah thei a. Chu corruption titu mihring chu a thenawm khawveng te nena an inkungkaihna tihchhiat sakin mi anchhia a phurh tir teuh thei a; an inchung khur ngei pawh damlai hremhmuna chan tirin corruption ti thei lova a awm veleh nun harsa tak a tawn phah theih mai bakah amah leh a chungte thlarau chu chatuan hremhmuna a hnuhluh sak thei a; inthup nana kohhran a belh ngat pheh chuan mi tam tak thlarau nun a vaw chau thei a, a pawh hle.

Corruption hi ram tinah a awm a. Tun dinhmuna chuan Scandinavian countries an tih ho-ah khuan nep berin Sub-Saharan Africa ram ho-ah khuan a nasa ber a. Kan chenna India leh a thenawm ram ho- Bangladesh te, Myanmar (Burma) te leh Pakistan te pawh hi corruption nasatna ram an ni.

Transparency International India leh Centre for Media Studies in an buatsaih – 'India Corruption Study 2005 to Improve Governance' in a tarlan dan chuan an zirchian chin state 20-a public service sawm leh pakhat chauha mi vantlangin thamna an pek belkhawm chu Rs 21,068 crores a ni a, mi pawimawh china thamna pawisa leng vel chu hemi let thum aia tlem lo tur hi nia ngaih a ni a.

Corruption lo awm chhan pasarih nia he zirchianna in a tarlan te chu : transparency leh accountability awm tha lo te, corruption report-na awm tha lo te, sorkar official te rinawm tawk loh vang te, intham hi nunphunga kan neih tawh vang te, Judiciary that tawk loh vang te, economic policy tha awm loh vang te, leh sorkar hnathawk te training leh orientation neih that loh vang te an ni a.

He zirchianna hian Mizoram a huam ve lo a. Corruption do kawnga thawh hlawk tak PRISM in Mizorama corruption nasat chhan bulpui pathum nia an hmuh ve thung chu - mi corrupt-ten Dân hremna an tawh thin loh vang te, kan politic khelh dân that tâwk loh vang te leh kohhran leh NGO tam zâwkin corruption kan pawm vang a ni thung a ni.

International Anti-Corruption Day 2009 Report

Corruption tihbo nana hmanraw tha leh awlsam ber tura ngaih chu transparency a ni a. Tihlawhtlinna atana tangkai ber tur erawh chu political will a ni thung a. Huapzo taka sorkar hmalakna kalpui te, planning, implementation leh monitoring-a comprehensive approach neih te, tum mumal tak nei bawk sia a tul anga kalphung thlak theih te hi hmanraw tangkai ber ber tura ngaih an ni a. Corruption chhui leh a titu hrem hi thil tul tawpkhawka ngaih a ni a, a chhuitu agency leh judicial system tha neihna ramah corruption a tlem bik tih Transparency International chuan a sawi a. Thuneihna sem zai a, local body te leh official zawng zawngin mawhphurhna leh thuneihna chin bik neih hran thliah hian corruption a titem theia ngaih a ni a. Hna lian tham thawh te vil zui a pawimawh a. Hnathawk tha te lawmman siam sak in kawngro a su thui thei hle bawk a. Kohhran leh NGO kan tih ang chi te an harhchhuah a, sorkar an tanpui a tul bawk nia ngaih a ni. Corruption dona kawnga inhmang te venhimna tha pek a tul a, USA-ah chuan United States of America, Whistleblowers Reinforcement Act 1998 neiin Australia-ah chuan Australia Whistleblowers Protection Act 1994 an nei tawh daih a ni.

Zep nak emaw, tunah hian Mizoramah corruption a nasa hle tih kan hre theuh a. Hei hi ngaihthah theih a ni tawh lo tih hretu vek kan ni. Engtin nge kan tih tak ang?

Kan ram atanga kan thlahtu te hriat ngai loh corruption umbo nan hian kan zavaiin mawhphurhna kan nei a. Sorkar te, sorkar hnathawk te, kohhran leh pawl ho te, khawtlang roreltu te, leh mitin hian hma kan lak a ngai a. Hetiang hian tawi te tein kan tih theih te chu i han sawi teh ang.

Pakhatnaah chuan sorkar hian langtlang leh rintlaka hna thawkin Right to Information Act hi anih dan tur takin kalpui se la; a inrelbawlina ruhrel leh kalphung hi corruption titem zawngin siam tha se la; Vigilance Commission dinin Anti Corruption Bureau hi thumam tha se la, judicial system hi tiphuisui se la; a hnathawk te enkawl leh a hmalakna kawng tinrengah Dan angin kal se la; thuneihna leh mawhphurhna semzai thiam se; zirna school-ah hian corruption that lohzia inzirtir ni se; corruption chungchangah public complaint mechanism tha siam chhuah ni se; hmasawanna tura ruahman project uluk taka siamin tha takin vil zui se la kawngro a su thui hle ang.

Pahnihnaah chuan sorkar hnathawk te hian an rilru puthmang thlakin Pathian tihna leh ram hmangaihna nen dik takin hna thawk se la. Anmahni leh an tu leh fa te tan ram dang an nei lo tih hre thar se. Zahawmna hi mimal hausakah inghat lovin ram dinhmunah a inghat a ni tih hre thar se kan that phah thui viau bawk ang.

Pathumnaah chuan tuna kohhran leh pawl kan neih sa te hi sorkar khalh ngil zawnga hma la turin piangthar hlawm i la. Kan pawl tana tha tur kan buaipui thin hian ram tan thil tha lo a nghawng chhuak thei tih hriain kan rilru puthmang thlak ngam i la kawngro a su thui hle ang a.

Khawtlang roreltu te hian dik taka ro relin sorkar hmalakna tihlawhtling turin inpe zual se la. Mimal tinin rilru thar puin sorkar hmalakna leh vantlang thil te hi taneih nachang hre thar i la; chanchinbu mi ten investigative journalism uar se la hma kan sawn thuai ang tih ka ring tlat a ni.

Engah nge he corruption, kan hnam thil pawh ni lo hi kan umbo theih loh ang?

International Anti-Corruption Day 2009 Report

Corruption umbo tur hian hun tha tak kan nei a sin. Right to Information Act neiin kan duh apiang kan hre thei tawh a. Kan RTI hi US leh Australia-a an Freedom of Information Act te aiin a tha zawk hialin a lang a. Hei hi kan hman tangkai thiam phawt chuan corruption hi kan veng thei dawn a. Chumai bakah corruption do tu te thiltih leh chanchinbu in corruption chungchang a ziah te hian sawimam dan zawng lovin a mawhphurtu zawngchhuak leh a tul anga action la zawngin sorkar hi kal char char se la kan thachhuak leh mai ang.

Hawh u, kan theihna zawn theuh atangin kan tawng pawha awm lo, engemaw avanga min tibuaitu ni rih mai mai corruption umbo tur hian, he Anti-Corruption Day atang hian nasa lehzualin ke i pen theuh ang u.

Annexure II

RADIO SPEECH OF Pu VANLALRUATA, PRESIDENT, PRISM

Corruption hian ram hmasawna a timuang a, ram chung mihring zingah inrinhlelh tawna a thlen a, politic khelh phung a ti chhia a, chatuan hremhmunah mi tam tak a hnuk lut a, mi rethei leh hausakar a tizau mai ni lovin dik lo taka hausate chu an hausakna leh thuneihna hum zui nan hmanraw chhe ber thlengin a hman tir thei a, a lehlamah mi rethei te chu hmanraw chhe ber hmanga mi hausate tihchhiat tumah a siam thei bawka. Chutiang a nghawng chhuah chinah chuan a sawp chu nasa tak a ni tih thin khawvel ram hrang hrang leh India ram state thenkhat te chanchinah chiang takin kan hmu thei a ni.

Vawiin December ni 9 hi kum 2003-a Mexico rama Merida-a UN General Assembly chuan resolution 58/4 of 31 October 2003 hmangin International Anti Corruption Day atan a puang a. He ni hi corruption awareness tihsan nana hman tura tih a ni. International Anti-Corruption Day-ah hian ram hruaitu te, political party hruaitu te, sorkar mi pawimawh te, sorkar pawm pawl ten corruption chungchang leh corruption dona chungchang-ah hma an la ho thin a. Corruption Do Pawl te chuan chak zawka corruption do nana hma lain chi hrang hrangin hun an hmang thin a. Kumin hian Mizoramah pawh hman tan ni dawnin lian tham takin PRISM huaihawtin Aizawl-ah chuan hun kan hmang dawn a ni.

Corruption tih tawngkam hi kan hman lar viau laiin Mizo tawnga a tlukpui kan nei hauh lo hi thil chhuanawm tak a ni a. Mi thenkhatin, "Japan ho chu an taima lutuk a, an tawngah hunawl sawina a awm lo," an tih thin ai mah hian 'kan twang corruption sawina awm lo hi a chhuanawm zawk' hialin ka hria a. Hei hian Mizo te hi hnam rinawm tak kan ni a, engemaw avangin corruption hian min tibuai rih mai mai a, kan hnam nun atang hian kan la paihbo leh thei ang tih a tilang chiang viauin ka hria.

Mizo te hian corruption inhrilhfiyah siak kan buaipui hi sim a hun tawh a. UNODC buatsaih- '**The Global Programme against Corruption - UN Anti-Corruption Toolkit**'-ah chuan khawvel pum pawm tlan theih corruption hrilhfiyahna a awm loh thu leh United Nations Convention Against Corruption in corruption hrilhfiyah tul a tih loh thu leh corruption huam thil hrang hrang ziahchhuah mai tha a tih thu tarlan a ni a. He thu hi pawm mai a, ram hmasawna tithuanawp thei corruption dona lama insawrbing mai hi a finthlakin

International Anti-Corruption Day 2009 Report

a lang a. Corruption hian sorkarin mipui tana tha tura ruahmanna a siam tihlawhtlinna kawnga Dan kal pela thiltih zawng zawng hi a huam vek a ni tih hriain hetiang thil tha lo hi do tawp mai i la kan thatpui ber a rinawm.

Corruption chungchangah hian boruak a inthlakthleng nasa hle a. Kum sawm vel kalta te kha chuan corruption hi kan sawi sep sep ngam chauh kha a ni a, tunah erawh chuan langsar takin khawvel ram tinah kan do ngam ta a. Mizoramah pawh kum 2006 atang khan langsar takin do a ni ta a. Corruption dotu pawl engemaw zat piangin chung pawl te hmalakna chuan nghawng thui tak a nei tawh a. Corruption dotu te hmalakna avanga mipui sum chingpen tur fel taka kal leh ta te, pawisa kawngbo tawh a nihna taka hman theih tura lo chhuak leh te, leh corruption avanga Dan hmanga man hial te pawh hmuh tur an awm ta a. Hetianga corruption dona leh duhlohna pung zel hian corruption pawh a tihlem zel avangin a dona leh duhlohna hi uar zawka kalpui zel a ngai a ni.

Corruption nghawng hi zau pui puiin kawng li- political, economic, social leh environmental ti tein a thliar hlawk theih a. Politic khelhnaa corruption hian democracy leh Dan kenkawhna a tichhia a, ram hruaitu tha kan neih theih loh phah thin a. Economy lama en chuan corruption hian ram leh a chhunga chengte a tirethei tial tial a, mipui leh ram tana sorkar ruahmanna lian pui pui a tihlawhchham thin a, sumdawnaah rinawmlahna hring chhuakin inbumna ramah a ram chu a chantir thin a. Mipui vantlang nun (social)-a a nghawng hi rapthlak berin mipuiin ram hruaitu leh sorkar an ring ngam lo mai ni lovin mi zawng zawng inrinhlehtawna a thlen thin a, chu chuan hnam inlungualna tichhiain intih tel telna a hring a, a tawpah pheh chuan thisen hial a luntir fo a. Project lian pui pui ruahman leh thawka tihlawhtling si lovin awmze nei lovin kan chenna leilung leh thing leh mau nasa taka tihchereu a ni thinin kan environment in nasa takin a chhiatphah thin a ni.

Mi pakhatin corruption a tih hi ram tan a pawl thui thei hle. Kan kawngpui tha tak neih tur enkawltu tu in emaw corruption a tih avangin mipui nuai telin kawngpui chhe tak neih phahin kum tam tak hrehawm kan tuar phah thei a. Chu corruption titu mihring chu a thenawm khawveng te nena an inkungkaihna tihchhiat sakin mi anchhia a phurh tir teuh thei a; an inchung khur ngei pawh damlai hremhmunah chan tirin corruption ti thei lova a awm veleh nun harsa tak a tawn phah theih mai bakah amah leh a chungte thlarau chu chatuan hremhmunah a hnuhluh sak thei a; inthup nana kohhran a belh ngat pheh chuan mi tam tak thlarau nun a vaw chau thei a, a pawl hle.

Transparency International India leh Centre for Media Studies in an buatsaih – 'India Corruption Study 2005 to Improve Governance' in a tarlan dan chuan an zirchian chin state 20-a public service sawm leh pakhat chauha mi vantlangin thamna an pek belkhawm chu Rs 21,068 crores a ni a, mi pawimawh china thamna pawisa leng vel chu hemi let thum aia tlem lo tur hi nia ngaih a ni a. Corruption lo awm chhan pasarih nia he zirchianna in a tarlan te chu : transparency leh accountability awm tha lo te, corruption report-na awm tha lo te, sorkar official te rinawm tawh loh vang te, intham hi nunphunga kan neih tawh vang te, Judiciary that tawh loh vang te, economic policy tha awm loh vang te, leh sorkar hnathawh te training leh orientation neih that loh vang te an ni a.

He zirchianna hian Mizoram a huam ve lo a. PRISM in Mizorama corruption nasat chhan bulpui pathum nia kan hmuh ve thung chu - mi corrupt-ten Dân hremna

International Anti-Corruption Day 2009 Report

an tawh thin loh vang te, kan politic khelh dân that tâwk loh vang te leh kohhran leh NGO tam zâwkin corruption kan pawm vang a ni thung a ni.

Corruption tihbo nana hmanraw tha leh awlsam ber tura ngaih chu transparency a ni a. Tihhlawhtlinna atana tangkai ber tur erawh chu political will a ni thung a.

Huapzo taka sorkar hmalakna kalpui te, planning, implementation leh monitoring-a comprehensive approach neih te, tum mumal tak nei bawk sia a tul anga kalphung thlak theih te hi hmanraw tangkai ber ber tura ngaih an ni a. Corruption chhui leh a titu hrem hi thil tul tawpkhawka ngaih a ni a, a chhuitu agency leh judicial system tha neihna ramah corruption a tlem bik tih Transparency International chuan a sawi a. Thuneihna sem zai a, local body te leh official zawng zawngin mawhphurhna leh thuneihna chin bik neih hran thliah hian corruption a titem theia ngaih a ni a. Hna lian tham thawh te vil zui a pawimawh a. Hnathawk tha te lawmman siam sak in kawngro a su thui thei hle bawk a. Kohhran leh NGO kan tih ang chi te an harhchhuah a, sorkar an tanpui a tul bawk nia ngaih a ni. Corruption dona kawnga inhmang te venhimna tha pek a tul bawk.

Zep nak emaw, tunah hian Mizoramah corruption a nasa hle tih kan hre theuh a. Hei hi ngaihthah theih a ni tawh lo tih hretu vek kan ni. Engtin nge kan tih tak ang?

Kan ram atanga kan thlahtu te hriat ngai loh corruption umbo nan hian kan zavaiin mawhphurhna kan nei a. Sorkar te, sorkar hnathawk te, kohhran leh pawl ho te, khawtlang roreltu te, leh mitin hian hma kan lak a ngai a. Hetiang hian tawi te tein kan tih theih te chu i han sawi teh ang.

Pakhatnaah chuan sorkar hian langtlang leh rintlaka hna thawkin Right to Information Act hi anih dan tur takin kalpui se la; a inrelbawlina ruhrel leh kalphung hi corruption titem zawngin siam tha se la; Vigilance Commission dinin Anti Corruption Bureau hi thum tha se la, judicial system hi tiphuisui se la; a hnathawk te enkawl leh a hmalakna kawng tinrengah Dan angin kal se la; thuneihna leh mawhphurhna semzai thiam se; zirna school-ah hian corruption that lohzia inzirtir ni se; corruption chungchangah public complaint mechanism tha siam chhuah ni se; hmasawna tura ruahman project uluk taka siamin tha takin vil zui se la kawngro a su thui hle ang.

Pahnihnaah chuan sorkar hnathawk te hian an rilru puthmang thlakin Pathian tihna leh ram hmangaihna nen dik takin hna thawk se la. Anmahni leh an tu leh fa te tan ram dang an nei lo tih hre thar se. Zahawmna hi mimal hausakah inghat lovin ram dinhmunah a inghat a ni tih hre thar se kan that phah thui viau bawk ang.

Pathumnaah chuan tuna kohhran leh pawl kan neih sa te hi sorkar khalh ngil zawnga hma la turin piangthar hlawm i la. Kan pawl tana tha tur kan buaipui thin hian ram tan thil tha lo a nghawng chhuak thei tih hriain kan rilru puthmang thlak ngam i la kawngro a su thui hle ang a.

Khawtlang roreltu te hian dik taka ro relin sorkar hmalakna tihlawhtling turin inpe zual se la. Mimal tinin rilru thar puin sorkar hmalakna leh vantlang thil te hi taneih nachang hre thar i la; chanchinbu mi ten investigative journalism uar se la hma kan sawn thuai ang tih ka ring tlat a ni.

International Anti-Corruption Day 2009 Report

Engah nge he corruption, kan hnam thil pawh ni lo hi kan umbo theih loh ang? Right to Information Act neiin kan duh apiang kan hre thei tawh a. Kan RTI hi US leh Australia-a an Freedom of Information Act te aiin a tha zawk hialin a lang a. Hei hi kan hman tangkai thiam phawt chuan corruption hi kan veng thei dawn a.

Chumai bakah corruption do tu te thiltih leh chanchinbu in corruption chungchang a ziah te hian sawimam dan zawng lovin a mawhphurtu zawngchhuak leh a tul anga action la zawngin sorkar hi kal char char se la kan thachhuak leh mai ang. Hawh u, kan theihna zawn theuh atangin kan tawng pawha awm lo, engemaw avanga min tibuaitu ni rih mai mai corruption umbo tur hian, he Anti-Corruption Day atang hian nasa lehzualin ke i pen theuh ang u.

Ka lawm e

Annexure III

KEY NOTE ADDRESS @ OBSERVATION OF INTERNATIONAL ANTI-CORRUPTION DAY

- Vanlalruata, President, PRISM

Corruption hian ram hmasawna a timuang a, ram chhung mihring zingah inrinhlelh tawna a thlen a, politic khelphung a ti chhia a, chatuan hremhmuna mi tam tak a hnuk lut a, mi rethei leh hausa kar a tizau mai ni lovin dik lo taka hausa te chu an hausakna leh thuneihna hum zui nan hmanraw chhe ber thlengin a hman tir thei a, a lehlamah mi rethei te chu hmanraw chhe ber hmanga mi hausa te tihchhiat tumah a siam thei bawk a. Chutiang a nghawng chhuah chinah chuan a sawp chu nasa tak a ni thin tih khawvel ram hrang hrang leh India ram state thenkhat te chanchinah chiang takin kan hmu thei a. Khawvelin corruption hi a buaipui a ni.

Kum 2003-a UN General Assembly khan December 9 hi International Anti Corruption Day atan a puang a. Khawvel ram hrang hrangah ram hruaitu te, political party hruaitu te, sorkar mi pawimawh te, sorkar pawm pawl, corruption dona lama inhmang ten corruption leh a dona chungchanga hma lak ho nan he ni hi chi hrang hrangin an hmang thin a. Kumin hian UNO chuan he ni thupui atan hian - 'Don't let corruption kill development' (Hmasawna hnathawh hi corruption i tihtawp tir lovang u) tih a hmang a. Keini erawh chuan, kan ram mil zawka kan ngaih angina, banner-a kan ziah ang hian 'Together we can stop corruption' (Tangrualin corruption kan tibo thei) tih kan hmang thung a ni.

Mizo te hian hun rei tak corruption hi kan lo inhrilhfiah siak tawh a. A corruption aia a hrilhfiahna kan buaipui avangin hun tha tam tak kha awmze nei mang lovah kan lo chhuah tawh a. Tunlai thleng hian mi thenkhat chu a hrilhfiah lamah kan la inhambuai reng a, hei hi ngaihtuah chian loh vang niin a lang. United Nations Convention Against Corruption chuan corruption hi hrilhfiah tul a ti lo a. Corruption hian 'sorkarin mipui tana tha tura ruahmanna a siam tihlawhchhamtu Dan kal pela thiltih zawng zawng a huam vek a ni' tih mai hi tha berah a ngai a. Keini pawh hian hei hi pawmin zawm thiam ila kan thatpui berin a rinawm.

Corruption nghawng hi zau pui puiin kawng li- political, economic, social leh environmental ti tein a thliar hlawk hlawk theih a. Politic khelhnaa corruption

International Anti-Corruption Day 2009 Report

hian democracy leh Dan kenkawhna a tichhia a, ram hruaitu tha kan neih theih loh phah thin a. Economy lama en chuan corruption hian ram leh a chhunga chengte a tirethei tial tial a, mipui leh ram tana sorkar ruahmanna lian pui pui a tihlawhchham thin a, sumdawnnaah rinawmlohna hring chhuakin inbumna ramah a ram chu a chantir thin a. Mipui vantlang nun (social)-a a nghawng hi rapthlak berin mipuiin ram hruaitu leh sorkar an ring ngam lo mai ni lovin mi zawng zawng inrinhlehtawanna a thlen thin a, chu chuan hnam inlungualna tichhiain intih tel telna a hring a, a tawpah phei chuan thisen hial a luantir fo a. Project lian pui pui ruahman leh thawka tihlawhtling si lovin kan chenna leilung leh thing leh mau nasa taka tihchereu a ni thinin kan environment in nasa takin a chhiatphah thin a ni.

Kan ramah hian corruption hi kan sawi sep sep ngam chauh kha a ni thin a, kum 2006 atang khan langsar takin do a ni ta a. Corruption dotu pawl engemaw zat piangin chung pawl te hmalakna chuan nghawng thui tak a nei tawh a - mipui sum chingpen tur fel taka kal leh ta te, pawisa kawngbo tawh a nihna taka hman theih tura lo chhuak leh te, corruption avanga Dan hmanga man hial te pawh hmuh tur an awm ta a ni. Corruption dona leh duhlohna pung zel hian corruption pawh a tihlem zel avangin a dona leh duhlohna hi uar zawka kalpui zel a ngai a ni.

Ram hrang hranga zirchianna hrang hrang chuan transparency leh accountability awm tha lo te, corruption report-na awm tha lo te, sorkar official te rinawm tawh loh vang te, intham hi nunphunga kan neih tawh vang te, Judiciary that tawh loh vang te, economic policy tha awm loh vang te, leh sorkar hnathawk te training leh orientation neih that loh vang te in corruption hi a nasa niin an sawi hlawm a. Amaherawh chu heng zirchianna hian Mizoram a huam ve lo a. PRISM in Mizorama corruption nasat chhan bulpui pathum nia kan hriat ve thung chu - kan politic kheih dân that tâwk loh vang te, kohhran leh NGO tam zâwkin corruption kan pawm vang te, leh mi corrupt-ten Dân hremna an tawh thin loh vang te a ni thung.

Corruption tih tawngkam hi kan hman lar viau laiin Mizo tawnga a tlukpui kan nei hauh lo hi thil chhuanawm tawpkhawk a ni a. Hei hian Mizo te hi hnam rinawm tak kan ni a, engemaw avangin corruption hian min tibuai rih mai mai a, kan hnam nun atang hian kan la paihbo leh thei ang tih a tilang chiang viauin kan hria.

Corruption tihbo nana hmanraw tha ber tura ngaih chu transparency leh accountability neih a ni a. Tihlawhtlinna atana tangkai ber tur erawh chu political will nia ngaih a ni thung.

Corruption umbo tur hian chance tha tak kan nei a. Right to Information Act neiin kan duh apiang kan hre thei tawh a. RTI hi sorkarin anih dan tura a tihlawhtlin chuan transparency a awm dawn a. RTI hmanga thil diklo haichhuah leh puanzar te a mawhphurtu zawngchhuak leh a tul anga action la zawnga sorkar hi a kal chuan accountability pawh kan nei tihna a ni mai dawn a. Corruption tihbo nana hmanraw tha ber pahnih transparency leh accountability te chu kuta ken ang thawthangin kan nei tawh tihna a ni.

Tuna kan challenge neih chu corruption tibo tura a tihlawhtlin nana tangkai ber tur political will dinhmun hi a ni ta a. Chumi chhanna chu thusawi tur te thusawi

International Anti-Corruption Day 2009 Report

atang hian kan hmuh theih ringin lo chang i la. Kan zavaiin he International Anti-Corruption Day atang hian corruption tihbo nana mi tangkai ber nih i tum theuh ang u.

Ka lawm e

ANNEXURE – IV SERIES

EIRUK HMANGTE TAWPNA

*Dr. JV. Nunchunga, Dept of Economics,
Govt J. Thankima College
jvnunchunga@gmail.com*

Ka mengmangah hian mitin mai hi kan lo buai em em mai a. A thenin eiruka an sak In lian pui pui lem te, mipui sum an eiruka an lei ram te, picnic spot leh zahmawh lem te hi an lo ziak hlawm a. A then te erawh chuan pangpar mawi tak te, a kal apiangin mawi an tih em em tur, en nuam tak leh rethei zawk tena an chhiar nin theih loh tur te, ram mipuiin an changkan phah sawtna tur hnan lungphun lem te hi an lo ziak a. Enga tan nge? tia ka han zawh chuan thlammual enkawltu chuan *'midangin an hriatrengna tur, an thlan lung tur an ziak mek a nih hi, ti hian an ziak ang ang hi an thlanah ka phun sak thin a, an tlan tur an ziak tih hi an hre silo'* tiin mi lo chhang a.

Dam lai hian kan thlan lung tur kan ziak mek reng a lo ni. Eiruk hmang te tawpna hi a duhawm lo thin hle. An thil tih theih lai, an tuh rah an la seng hma hi chuan awhawmin an lang thin. Thil an tithei a, an tluang riau hian a hriat. Mahse, Dik awm taka lang, a tawpna chu thihna a ni lo ni si thin. Tluang takin lang thin mahse, an tawpna erawh an tu leh fate thleng pawh a zah thlak, mi nuihzat burna a lo ni thin. Chung ho chan chin tlem han en ila.

1. Ferdinand Marcos, Ex-President, Philippine: Zirtirtu ve ve Josefa Edralin leh Mariano Marcos te fapa Ferdinand Marcos chu Sarrat, Ilocos North, Philippine-ah September 11, 1917 khan a lo piang a. Mi thil hrerei thei tak mai leh mi pangngai chunglam a ni. Kum 18 a nih kum, September 20, 1935 khan Julio Nalundasan chu a han kap hlum pawp mai a. Tual thah avangin an man a, Chiang takin thiam loh chan a ni. Jail a tan lain phek 830-a chhan chhuah dilna a ziak. Judge lam an tih lungawi avangin a chhuak a. Politics-ah lutin kum 1965 leh 1969 khan President-ah thlan an ni a.

Thil ti thei tak mai a ni a, amah chotu apiang te chu a tudawl zel mai hian a hriat a, a mah han cho phatu an awm lo. A tluang viau hian a lang. Mahse, eirukna lamah a lo inhnawh nasa mai hi a lo ni a. A vawi 2-na a a tlin sawisel hian mipui an lungawi lova, buaina nasa tak a chhuak a. Kum 1972-ah Martial law a puang a. kum 1981 a lo nih chuan a hlip a, thuneihna pumhmawm zelin kum 1983 August thlaah Benigno S. Aquino Jr. thah a ni a, a thattu nia rinhleh Marcos-a sipai te chu 1985-ah thiam an chang vek. Kum 1986-ah a lalna tinghettu mai atan inthlanna a buatsaih a, thlan tlin ani tih an puang chiah tihin mipui lungawi lo kawngzawh chuan an president chu ram danga tlan chhe lo thei lovin an siam a. America thlawhnain Hawiii thliarkarah an tlan chhe ta a ni.

An ni upa hi eiru nasa lutuk, an hun laia khawvela hausa ber nupa an tih a ni. Billion 5 to 10 billoin vel hi an chheprelh niin an chhut a, a tlan chhiat pawh hian US pawisa 28 miillion leh thil rohlu 300 chuang a tlan chhiat pui. A nupui Imelda

International Anti-Corruption Day 2009 Report

pawh hi khawvelah pheikhawk ngah bera an sawi a ni a, bun 2000 chuang a nei an ti. Switzerland –a a bank account an man a mi ringawt pawh \$475 million a tling. kum 1995 khan an ram sawrkar cuan a tlereuh an zuar/ auction a, \$13 million man lai a tling. President a nih laia human rights a violate avangin kum 1999 khan Marcos-a chhungte chuan \$150 million chu a tuartu mi 10,000 vel hnenah zanggadawmna atan pek an rem ti.

Ropui taka thlan tlin kha tlawm takin ramdangah kum 1989 khan a tlawm takin boral ta a ni.

2. Thaksin Shinawatra, Ex-PM of Thailand: Kum 1949 July 26 khan Chiangmai-ah Buddhism sakhua chungkuaah a lo piang chhuak a, mi lehkha thiam tak niin USA atangin MA leh Ph D a la a, Ph D phe chu Criminal Justice, Sam Houston State University atangin a nei a. A ma sumdawmna Shinawatra Computer and Communications Public Company Limited tih chu dinin chairman a ni a. kum 1994 October 18 khan chu a nihna chu bansanin Minister of Foreign affairs-ah November 1994 chuan dah a ni . July 20, 1995- Nov 14, 1997 thleng Dy PM ah dah niin kum 1998-ah Thai rak thai Party a din.

Kum 2001 January election-ah hnehna changing PM a ni a, Policy lian tak tak a siam a, retheihna umbo tumin hma ala nasa hle. Health care lampawh a tha viau. A larin mi pawhin an duh a, Thailand PM post chelh zo thei awmchhun hmasa ber a ni bawk. Chuvangin a term 2-na atan an thlang leh a. Thaksinomics, Thaksin's economic policy chuan an ram sumpai dinhmun a siam tha hle. Kum 2001 a , An ram GDP 4.9 trillion baht ni thin chu kum 2006-ah chuan 7.1 trillion baht a ni thei. IMF-a an ba pawh pek tlak hun hma kum 2-ah an rul vek bawk. An ram chhunga rethei ber bial 'Northeast bial' chhung mipui sum lakluh pawh kum 2000 leh 2004, inkar khan 40% in a sang bawk. Rethei % pawh a hniam chak hle 21.3 per cent atangin 11.3 per cent-ah a chhuk thla. An ram budget deficit thin pawh kum 2003-2005 khan a ti surplus thei bawk. Foreign exchange reserves pawh kum 2001 a US \$30 billion chu kum 2006-ah chuan US \$64 billiona tling.

Tluang tak leh awhawm takin hepa hi lang mah se, corruption lamah a lo inhmang nasa hle mai. Heng avang hian amah duh lohna leh sawiselna a nasa hle, sipai inrawlh ngai khawpin a awm a, 19 September 2006 khan NY khawpui a tlawh a, a zin hlan hian sipai ho ten a sawrkar chu an laksak ta a, a tuk ni 20 a nih meuh chuan sipai tank leh motor chuan office zawng zawng an hual vek tawh.

Kum 2003-a ram pali baht million 772-a an nupa a an lei avangin corruption case an awrh a, March 2007 khan Office of the Attorney-General chuan Thaksin-a nupui leh a laina hnai te chu chhiah 546 million baht (US\$15.6 million) awlruk an tum avangin case a siam bawk, April 2009 khan 100 billion baht (US\$2.8 billion) chheprelh a puh a ni bawk. Hetiang hian eiruk thubuui a awrh mawlh mawl ta mai. Tunah phe chu an a party din pawh an 'ban' tawh a, hming tharin an kal ta a ni. Politic khel lova football lama kal chu a duh a, a hma a lei a tum-Football club lar tak pakhat Fullham leh loverpool te- chu lei thei lo mah se, Manchester City chu £81.6 million –in a lei a, a hnuah a hralh leh an ni awm e.

PM ni thin khan an ram pawh lut ngam lovin a tlan chhia a, Kum 2007 may khan an PM Surayud Chulanont chuan a rawn hawn rem ti a, Jan 2008 a, a nupui rawn haw chu Airport-ah an lo man a, bail chhuah ni mah se, an ram chhuahsan

International Anti-Corruption Day 2009 Report

an phal lo. Kum 2008 Feb khan thla 17 zet an ram atanga a bo hnu-ah an ram a lut a, an lo man leh nghal a, bail in a chhuak leh a, Eirukna thubuai ewngemaw zata awrh a, a awr belh zel bawk. An bail Dan kalh a rampawn a chhuah avang leh eirukna thubuai avangin an ram supreme court-in manna thupek a chhuak fova,

PM ni thin leh midang te chung a khawsa thin kha tunah chuan eirukna avangin an rama haw ngam tawh lovin ramdang te khawngaihna dilin a awm vel ta mai mai a, tunah hian Cambodia ramah a awm mek a ni.

3. Toshikatsi Matsuoka, Ex- minister of Japan: Toshikatsi hi minister fel tak leh Japan cabinet-ah chuan mi pawimawh ber pawl a ni a, portfolio tha thiau mai Agriculture, Forestry, Fisheries te a chang. A dinhmun chu a awhawm viau mai.

Mahse, a dihmun chu a hmang sual a, a thlawna an dawn thin - tui, intihlumna, etc sensoah kum nga chhunga \$2,40,000 zet hmang anga a inziak a vangin case a nei a. Hemi chung changa an dawp tur chu ngai ngam lovin May 2007 khan a ma chenna inah a inawkhlum ta a ni. Indopui II-na hnua a Japan Cabinet Minister inawkhlum hmasa ber a ni

4. PV. Narasimha Roa, Ex-PM of India: Kum 1921 June thla khan Andra Pradesh state-ah PV Narasimha Roa hi a lo piang a, Mi fing leh fel tak niin India state lian leh hausa Andra Pradesh-ah chif Minister a ni thei ngat a ni. Tawng chi hrang hrang 17 – (Urdu, Marathi, Kannada, Hindi, Tamil, Telugu, Oriya, English, French, Arabic, Spanish, Persian, etc) ten duh tawkin a tawng thei. Pa namai lo tak a ni.

PM a nih chhoh hian India chuan harsatna nasa tak a tawk a. India pawisa hlutna Dollar khat chu Rs 17 atangin Rs 32-ah a tla thla a, FOREX a tlem em em a, chawlhkar tam daih a awm lo. Chutih lain kil hrang hrangah inlak hran duhna movement (J & K, Assam, Nagaland, etc) a lo awm. Harsatna a hmachhawn tam hle. India ram economic chhan chhuak turin economic Mosia - Economist Dr. Man Mohan Singh a han la chhuak ngam a, India ramin tun tlengin kan la tangkaipui. A PM chhungin reforms tam tak a siam a. India economy chu a thang duang hle a, No confidence motion pawh a pal tlang a, a lal lai chuan a ropui bur bur khawp mai. Chelhdin zawh loh emaw tih mai tur a ni.

Mahse, a hun lai khan corruption-ah a lo inhnawhniwih thuk lulai deuh a ni. A hun hnunung lam chu hreawmna leh case rip tak takin a um reng a ni ber mai. kum 1993-ah JMM MP leh JD PM keh then te vote-in a lei a, VP Singha fapa Ajeya Singh-a hmingin accout hawn lem thubuai 'St. Kitts forgery case' an tih maiah a mualpho nasa hle mai. England a awm tawh India sumdawng Lakhubhai Pathak-a hnen atangin thamna Cheng \$1,00,000/- hu zet dawng angin change a ni leh a. Thiam loh a han chang zar zar a, eng tin tin emaw chuan a han fihlim ti tih thin.

A PM chhungin ropui viau mah se, a dam chhug tawp lam chu lungngaihna leh mualphonain an thlan thleng a um a ni ber mai. A hun chhungin ropui viau mahse, lungngaihna leh zahna chuan a thihna hlim kawrah a um liam ta a ni ber nia ngaitheih turin 2004 Dec ni 9 khan heart attack avangin a boral ta a ni.

International Anti-Corruption Day 2009 Report

5. Madhu Koda, Ex- CM, Jharkhan : Kum 2005 khan Jagannathpur leh kum 2009 hian Singhbhum bial atangin independent in a tling a. Party lian leh MLA ngah tak Congress leh BJP ten sawrkarna an siam theih si loh avangin a ni independent MLA mai, kum 38 mi lek chu Chief minister atan a awm ta ngawt mai. A hun lai chuan a nuam awm hle mai

Kum 2005 khan a pawisa fai kawl chu Rs 30,000/- a niin a bungraw hlutna chu Rs nuai 13 hu vel a ni a. Amah tlawnin National Party 2 an awn an awn a, a nuam khawp ang. Tunah UPA sawrkar thlawptu a ni a, MP a ni bawk a, a thil neih hlutna pawh a pung nasa hle mai. Kum 2009-ah chuan a pawisa fai kawl chu Rs nuai 13.6 niin a bungraw hlutna pawh Rs nuai 94 chuang a ni tawh bawk

'Tribal rethei mai ka ni' inti si chuan a kua a han hre pawp tak tak mai chu, tawpna chang hre lovin eiruknaah a lu thuk ta a. October ni 9 khan case an awrh ta nawlh mai. Tunah chuan IT hawala case Rs vaibelchhe 2,000/- vel zet inzeh ruknaah vigilance commission, Income Tax department leh Enforcement Directorate ten an veh a, han inti luh lul viau thin teh mahse, Chaibasa district atangin an man ta tho a nih kha. An han chhui tak tak a, a thil neih hlutna ringawt pawh Rs vaibelchhe sangtel a lo ni.

A hun laiin vannei viauin lang mah se, a dam chhungin he hreawmna hian a awm zel ang a, tichuan Pathiai ngaihdamna a chan loh pheii chuan kum khuain meidilah a awm reng ang.

6. Abdul Karim Telgi : Stamp paper lem siamna a a mawhpurtu lian ber Abdul Karim Telgi chu a hlawk lai chuan a hlawk nasa mai. Min 300 vel agent-ah a hmang a, a han hralh tak tak mai chu banks, FIs, insurance companies, leh share-broking firms, atd (adangte), ten an lei chur chur mai. A thla khat hlep ringawt pawh Rs Vaibelchhe 202 vel ni a chhut a ni. A mah dotu tur apiang chu sum leh silaiin a do tlang mai zel. Mi tam takin man tinah an tin lova, man chiah pawh an ruat lo. Mahse, a ngam loh Mizo Pa a tawng ta a, manin a awm a. Judge Chitra Bhedi of a special court chuan Kum 13 chung hna hreawm thawka tang tur leh Rs Vaivelchhhe 202 chawi tura a chung thu rel a ni ta a ni. A ni hi Maharashtra leh Karnataka chhunga thubuui hremna na ber a la ni bawk.

Corruption hmanga inla hausa te lerh thuneihna hmang sua te hi a tirah chuan chungnung angin lang thin mah se, an tawpna hi a duhawm lo thin hle. An chhungte leh lanina tan te pawh thil sawi zahthlak a ni thin.

Hetiang ho hi khawvel history-in a ngaidam thei lo. Eiru ho hi an damlai reng atangin an thi a, an duh dan taka an dam lai atanga ziak chu history hian an thlan atan a phun mai a ni, an than lunga ziak chu an duh loh theih a ni tawh lo, a chhan chu an duh dan anga an damlaia an ziak a ni miao si a.

CORRUPTION-IN CHHUNGKUA A NGHAWNG DAN

- Rosiamliana Tochwawng. ATC

Thuhmahruai: Synod inkhawmpui laia helai paper lo present hi a tirah chuan ka inthlahrung deuh a. Mahse kan Kohhran ngei pawh hian Corruption tihbo tum hian nasa takin tan a la a. Kum 1982 kha CORRUPTION DO KUM ah puangin mipui inzirtirna leh hmalak dan tur ruahmanna te pawh a buin a chhuah hial a. Tunhnai deuhah pawh Corruption that lohzia inzirtir nise tiin a inzirtirna bute a chhuah leh bawk a. Chuvangin Kohhran duh zawng tihpuitlinna a nih ringin ka inbuatsaih ve leh ta zawk a. Tin, PRISM hmalakna hi ngun takin ka lo thlir ve a, hman deuh khan MPF seminar kan neihnaah "In hnathawh hi Pathian duh zawng a ni a, nangmahnia thawktu pawh Isua a ni ang" te ka ti a, chutiang pawlin an hnathawhnaa min sawm ve chu zahawm ka tiin, he rawngbawlinaa ka tel vena remchangah ngaiin he paper hi ka buatsaih ve ta a ni.

Corruption Chhumpui Zing: Corruption dona kawnga khawvela pawl langsar tak chu Transparency International hi an ni awm e. An ni hian kumtinin Corruption Perception Index an tichhuak thin a, data tha tawh lakhawmin khawvel ram hrang hrang te corruption-a an dinhmun nia ngaih an tarlang thin. Ram 180 zet zingah India hi a laihawl vel (2009-ah 84-na) kan ni a. Mizoram min karchehtu ram te phei hi chu chu aia hnungfeah chuan an la awm, Bangladesh 139-na a ni a, Myanmar khi 178-na a ni a, khawvel pumah corruption-ah pathumna a ni tihna a ni a, nikum lam phei kha chuan pahnhna a ni. Politics stability hian corruption a tinep niin a hriat.

Chutiang ramin a karcheh Mizoram hi enge kan dinhmun chiah ni ang le? Mumal taka intehna a la awm lo a ni mai thei. Mahse kan dinhmun hi a tha lo hle niin a hriat. Kan rama corruption dinhmun tarlanna tha tak hi neih mai a har. Hman deuh khan (early 1990s) lehkhabu pakhat Zoram Khawvar Hun Nghakin tih kha a lo chhuak a, a ziaktu hming a chuang lo a, a hunlaia Corruption kalphung chu a tarlang tha hle. PRISM booklet No-1 Puanhnuai Thil tihah hian Corruption tam tak hailan a ni a, mahse hengte hi engtin chiah nge bawhzui an nih? FLAM lehkhabu Thih Huamin Aw tihah pawh hian Corruption kalphung tarlan a ni bawk. Chanchinbu hrang hrangah Corruptuion chungchang hi a lang ve chamchi a, chung te chuan mupui min chawh harh hle. Kum 2006 kha Corruption kan vei kum tak a ni mai thei. A chungah lehkhabu te hi kum 2006-a chhuak an ni hlawm a. Vanglaini Daily-a Tea Pa thuziak te kha - Mawza Aw Mawza (4.7.2006), Thingtlang Pa Tawngtaina (29.7.2009), Reteite Tan Chanchin Lungngaihthlak (4.9.2006), Kelpal, aw kelpal! (10.8.2006), Pu Te u, In chungah Pathianin Ro a La rel Dawn (9.7.2006) etc te kha kei chuan a hranpain ka dah tha a, ka chhiar nawn fo mai. Corruption chungchanga kan ram dinhmun min hrihtu darthlang tha tak an ni.

Corruption leh Chhungkua: Internet-ah corruption chungchang thupui hrang hrang ziaq hi a tam hle a, working papers pawh hmuh tur a awm nual. Mahse chhungkua a nghawng dan emaw chhungkua nena a inlaichinna lam ka hmu mai lo. Chhungkua hi mihring nunhona bulpui a ni a, chhungkaw tha hi ram leh hnam lungphum a ni. Corruption leh chhungkua tih hian kawng hnihin a sawi theih. Chhungkaw boruakin mi a corrupt tir theih dan hi sawi tham tak a awm a; corruption-in chhungkua a nghawng dan hi sawi tur tam fe a awm bawk. Heng kawng hnih te hi tawi fel deuhin sawi tum ila.

Chhungkuain Corruption-a thlen dan: Pa tam tak leh nu tam tak chu an duhthu reng ni lovin an chhungte nawrna avangin an corrupt a ni. 'Ei ru rawh' chu an inti bawl lo. Mahse chhungkaw tana rualawhna hian dik tawk lo pawha sum neih duhnaah mi a hruai thin. Nu berin thenawmte neih ang neih ve a chak ngawih ngawih a, pa a kar fo chuan pa tan chuan a neih theih dan kawng zawn mai a awl a ni. Faten mi ta ang thil an awh ngawih ngawih a, an ngen chhen chuan sum thianghlim lo pawh pawisak lohnaah mi a thlen thin. Mahni chhia leh tha hriatna thiang atanga dik lo nia hriat tih luih hi nawrtu awm lo chuan harsa kan ti theuhin ka ring. Eiru tur pawh hian chhungkaw tam tak hi nawrtu chak tak kan ni. Mahni chhungkaw sum hailuh mila khawsa thiam lo leh mahni sum hmuh ngaihtuah lova midang khawsak dan ringawt mai thlira rualawhna hian corruption-ah min hruai lut thin a ni. Helam hi chu duh tawk mai ila.

Corruption-in Chhungkua a nghawng dan: Sawi tak angina corruption leh chhungkaw chungchang hi ngun taka zirna han hmuh mai tur a vang deuh a, mahse kan ngaih pawimawh tak leh thupui pawimawh tak a ni bawk si. Kan ramah ngei pawh hian survey felfai tak neih a chakawm hle. Corrupt chhungkua chu an fate an sual duh han ti ngawt dawn ila, corrupt a ngaih mahse fate fel fu fu si sawi tur kan hre nual mai thei. Chutiawng bawkin corrupt lo pawh fate sual fe fe sawi tur an tam bawk si ang. Chuvangin mihring nunhona chungchang hi zaa za thudik sawi a har khawp mai. 'Pahnih leh pahnih belh chu pali' a ni tih ang tawp hian mihring nun hi a sawi ve theih thin loh. Mahse chuti chung chuan thil dik tlangpui erawh chu a awmin a hriat bawk.

1. Double Standard of Morality – Faten an hrethiam thei lo: Hman deuh khan tum khat chu pa pakhat hian a fate kawm turin min sawm a. A fate (nula leh tlangval) chuan ruihtheih thil an ti thin a, a fapa zawk phei chu a piangthar an lawm hle hnuah ruihtheih thil lamah bawk a kal leh tak avangin an buai hle a ni. In chhawng sang takah min hruai a, a fate chu ka kawm ta a. rei ngial kan inkawm hnu chuan a tlangval zawk chuan, "I hriat angin ka pa hi kan kohhranah rawngbawltu pawimawh ve tak a ni a, kan chhungkua hian missionary pawh kan chawm a ni. Ka nu leh paten Pathian thu min duhsak hi ka lawm a, tichuan camp-ah te lutin ka piangthar a. Tichuan dawr nghakah min duh a (motor parts zuar an ni a), dawr ka nghahnaah chuan sorkar nena kan indawrnaah bill dik loa ziah a ngai thin a, 'ka pa hei hi chu Pathian thu nen a inmil lo a ni' ka ti a; ka pa chuan 'hetiang hi kan tih si loh chuan kan sumdawnna hi a chhia a ni mai' tiin ka rilruin dik a tih loh chu min tihtir zel bawk si a. Rilru inthiam lo chungin, Pathian duh loh zawng a ni tih hre chungin ka pa thuawihin chu thil chu ka ti ta zel a, tun hi ka thleng ta. A dik loa indent ziah kha a pawl loh chuan ruihtheih thil hi enge a sualna bik ka hre lo ve" a ti ta a.

Hei hian Corruption-in chhungkaw nun a nghawng dan kawng khat chu a tarlang tha hle awm e. Nu leh pate hian kan fate chu tha turin kan duh a, an tana thil tha kan duhsak luatah a dik lo thleng pawhin sum lakluh kan duh hial thin. Mahse kan awmdan leh thiltih dan hi kan fate hian an hai hauh lo, chuvangin thil dik leh tha hriatna kawngah an rilru nasa taka tihbuai a ni a. Ngaihsan tur an hre lo a, an thudik hriat chu lehlamah dik loin an hre bawk si a. Nu leh pain thu tha leh Pathian thu an hrilh te pawh a taka an hmuh nen a inmil si loh avangin engtia nun tur nge tihah an buai a ni.

Thil dik leh tha hi chhungkuaah inzirtirin nun dan dika inkaihruai hi tum thin mah ila, kan nun a dik si loh chuan rilru sakhat leh mahni inrintawknana nen a sawi ve tak tak theih loh. Rilru lamah inthiamlohna a awm tho tho.

International Anti-Corruption Day 2009 Report

Chutianga rilru sakhat leh dik intihna tel loa inkaihruai kan tumna zawng zawng hi thup theih a ni tak tak lo. Kan kaihruai tum kan fate hi kan awmdan engkim hretu an ni. Eiru chungang nun dik inzirtir tum hian fateah moral chaos a thlen a, chhungkuaah inrintawn lohna (confident crisis) a thlen thin. Faten nu emaw pa emaw an rin loh miao chuan hnial ngam lo mahse an thu an awih thei lo; nun inghahna tur an hmu lo a, chu chuan hel rilru a put tira, nu leh paten an khap thil te pawh a tihchhin chak tir a ni. Nun kaihruaitu tur berin rin an hlawh tawh loh chuan nun mumal lo thei tawh lo a; nun inghahna mumal nei loin fate an lo seilian a, chu chuan chhungkua tidarhin rei lo teah chhungkaw tam tak chu an tawp titih mai thin. Chhanchhuah an nih loh phei chuan thlarau boralna kawng an zawh nge nge thin a ni. Chutiang chhungkua chu sawi tur kan hre teuhin ka ring.

2. Easy come –easy go: A dik loa sum hmuh hi a dik loa hman a awl em em. Tupawh mai hian hah tak leh rim taka kan thawhchhuah hi chu uluk tak leh fimkhur takin kan hmang a; awlsam tea kan neih hi chu a hman pawh kan awlsam a, hotea kan hmuh chu hoteah bawh kan hmang thin. Dik taka kan hmuh ni lo hi chu hman dan tur dik tak ni loah hman a nih thin. Hetianga a hman dan tur fel tak leh dik tak ni loa sum hman (unreasonable use of money) hi mihring nun tichhe vektu leh chhungkaw nun ngei pawh tikehdarhtu a ni.

Kan ramah hian chhungkaw tam tak chu sual avangin an rum a ni. Pa ber nula kawp ching, zu leh ruihtheih thil avanga buai, chhungkaw inngeih lo leh nupa inthen te hi kan tam hle a ni. HIV+ pun dan te hi en ila, nu an nau neih vawikhatnaa positive si lo, a hnulama positive ta hi an tam ta hle mai, chumiin a entir chian chu uirena a nasa tih a ni.

Heng sualna bul lian tak chu corruption hi a ni. Pa fel tak pawh hi an hlawh bak, mi hriatpui lem loha an lak fo chuan chutiang sum extra chuan sualah mi a hruai awl em em a ni. Chik takin han chhut kauh kauh ila-corruption hian sex leh ruihtheih thilah mi a hruai lut nasa a ni. Chu chuan nupa nun a tikeh a, chhungkaw thlungkhawmtu hmangaihna hruipui a chah a, a rinawm tawh loh chuan chu chhungkua chuan kehsawm a pan mek a ni. Nu tam tak pawh sum leh promotion duh avangin an inphalrai thin a, chu chuan nupa nunah inthiamlohna ruk siamin nupa nun a hlim tak tak thei lo.

Sum thianghlim lo hian nupa kara rinawm lohna a thlenin nupa nun a tichhia a; chutiang bawkin fate nun pawh a khawih pawh hle a ni. Sum thianghlim lo hmangin sikul tha leh phaiah te dahin an sum lakluh tur dik taka chhuta an khawsak dan tur aia sang fein an chawm a, chutiang naupang chuan mihring nuna thil hlu rinawmna leh taihmakna te chu an hrethiam tawh thin lo. Nu leh paten theihtawp chhuahin enkawl an inti a, naupang lam lahin an nu leh pate sum lakluh chhuta an khawsak theih dan piah lam daiha an lo khawsak tawh avangin chutiang chu an nunphung pangngai turah an ngai tawh laklawh bawh si a; a tawpah chuan nu leh pa leh fate inkarah buaina (familial discord) a chhuak nge nge thin. A tawpah chuan nu leh pa tam tak chu an fate sual avangin an tap tlawk tlawk a, mahse an thiamlohna a hmu thei bawh si lo. Dikna leh rinawmna tel lo sum hmanga inenkawlina chuan rah a chhuah tha tak tak

International Anti-Corruption Day 2009 Report

thei lo. "Engmah lo mai mai sum dehchhuah chu tihrial a ni ang a, Thawhrima khawl erawh chu a pung ang" (Thuf 13:11)

3. Affluent Neglect: Kan rama chhungkaw tam tak tihrehawmtu leh tithlabartu thangthar nun sual kan tih hi a chhan tawi tea sawi dawn chuan 'affluent neglect' an tih hi a ni ang. Kan ramah birth control policy sawimawiin kan chawm zawh tawk fa i nei ang kan ti a; mahse tunah hian mi tam tak harsatna chu fate an chawm zo lutuk hi a ni awm e. Nu leh pa tam takin chhungkua tana tha nia kan hriat dan hi sum leh paia hneh taka chawm hi a ni em aw tih tur a ni. Mahni thawhchhuaha inenkawl tir tum aiin an mamawh leh awzawng apiang tih sak theih hi nu leh pa tam tak fa enkawl dan a ni ta hial em? Incheina manto pui pui leh electronic gadgets man sang tak tak thawhchhuah nei lo zirlaiten an nei thei hi thil tha a ni hran lo. Sum hmuhna a awlsam atanga pawisa nei ten nun dan thaa taima taka kaihruai aiin an mamawh sum hmanga tihsak an ni nasa lutuk hi chhungkaw tam tak harsatna a ni.
4. House Making Business - Home Making Business: Corruption-in chhungkua nghawng dan langsar ang reng tak chu in tha pui pui hnuai chhungkaw nun awm mang si lo hi a ni. Kan in leh lo hi a tha sawt khawp mai, kan inchhung chei dan leh bungbel te pawh a changkang hle a ni. Hmanni khan German atanga lo kal Professor pakhat nen Aizawlah hian kan kal kual a, in sak a en a, 'An hausa awm hle mai, sum chu an nei a nih hi' a ti. In hi kan buaipui nasa hle a, chhungkua erawh kan buaipui tawk lo. Dr. Kenneth Chaffin-a zawhna "Inah chhungkua a awm em?" tih kha rilruah a lang thin. Corruption-a sak in ropui tak takah hian chhungkaw hlim kan hmu si lo. "Insual bur bura ruaithehna in ai chuan inrem taka chaw thing bar khat eina a tha zawk" Thuf 17:1

Dak La, en teh: Mi hausa an hun laia hausa leh ropui tak nia ngaih mahse chhuan tam daih lo chhungkua hi Aizawlah ngawt pawh hian survey nei ta ila kan chhui chhuak teuh ang. 1970 vela Mizorama mi hausa tu te nge? 1980 velah tu chhungkua hausa? 1990 velah tu chhungkua nge hausa? Chung chhungkaw kal zel chu han chhut ila- sum dik lo hmanga hausa chhungkua tun thlenga chhungkaw awhawm leh zahawm ni zui zel engzatnge awm?

Dik taka tih hi a tlo a, a daih rei a, a zahawmin a nghet a ni. Eiruk hmangin mi a hausa thut thei, mahse chhungkaw ngelnghet leh hlim tlang erawh neih a har. Bible-in a sawi angin "Lalpa hlauhna nena tlemte neih chu tam tak neiha buaina ai chuan a tha zawk" (Thuf 15:16).

CORRUPTION LEH RAM HMASAWNNA

-Lallianchunga
Mizoram University

Corruption tih tawngkam hi Latin thumal *corrumpere* atanga lo kal a ni a; a awmzia chu *hmantlakloh*, *chhia* tihna emaw, *rilru lama that lohna nei* tihna emaw a kaww awm e. Mizote erawh chuan 'eirukna' kan ti tlawng mai.

Eirukna hi khawi ramah mah hian a tuitla hauh lova; chuvang chuan hming lem pawh a ngah hle. Thailand ramah chuan *gin muong* an ti a; chu chu *hnam eichhiatna* (nation eating) tihna a ni a. Sawrkar hnathawk leh minister eiru hnem ho hian ram leh hnam an eichhe reng a ni. China ho khian *tan wu* tiin an vuah a, *duhamna thianghlimlo* tihna a ni. Mihringte hi duhamnaa khat kan ni a; mahse, kan duhamna chu a thianghlimloh erawh chuan sual a tling thung. Japan ho erawh khi chuan *oshoke* an ti ve thung a. Chu chu *hna thianghlim lo* tihna tluk vel a ni awm e. Eirukna hi khawi ramah mah hnathiinghlima ngaih chu a ni lo alawm.

America ho erawh chuan eirukna hi *black account* tiin hming lem an pe ve thung a. Miin ramdang bank-ah arukin pawisa an chhep relh a, an duh hun hunah an la chhuak leh mai thin. Eiruk pawisa ramdanga chheprelh hi ram hrang hranga mite paw'n an ching ve hle; India ramah pawh kan politician te hian an ti ve thin a, chuvangin eiruk case tam tak a awm pah bawk. Italy-ah chuan miin midang hnena thamna a pek hian *bustarelle* an ti a; envelop-ah pawisa thunin an pekate dawhkanah an hnutchhiah mai thin. Thailand ramah khian sawrkar hnathawkte'n ualau takin thamna an la thin an ti. Thamna pawisa mi hnenah i pe duh anih chuan I pek tura hnenah khan "*oh, tinge I wallet, a chhunga baht...awm I thlah e,*" tiin I pawisa pek zat I sawi ang a. Ani chuan "*Pawi lutuk ,baht.....ka thlah e,*" tiin pawisa a beisei zat a sawi mai ang. Mizote hian engtik hun atangin nge eirukna hi kan hmelhriat? District Council hun atangin nge, Union Territory kan nih hun atang khan? Nge, State kan nih hnu atang chauh hian em ni? Engpawhnise, eirukna hi Mizote'n kan hmelhriatna a la rei lo hle. Mahse, eirukna vanga kan khawtlang nun danglam tak zia te, development hna muangchan zia te hi mit leh beng nei tan chaun hmuh leh hriat hmaih theih a ni lovang, a rim pawh hriat theih a ni hial ang chu...!

Lal an bang a, khawtlang rorelna chu mipuite thlan tlin mi tlemte kutah leh sawrkar babu te kutah a lo awm ta a. anni hian ram pum chu an enkawl a. Tin, he mite phenah hian sawrkar hnuai hlawkna um, hnathawktu Contractor/ supplier an awm leh a. Contractor te chuan hnathawh tur an hmuh theih nan roreltute leh babu te chu an biak thiam hle a ngai a. An biak thiam poh leh an tan hlawkna a nih avangin hmanraw chikim an hmang ta thin a ... Contractor hlawk bawk, roreltute leh official te hlawk bawk . Tichuan, eirukna chu a lo awm ta a, ti mai ang.

A la rei lo hle. Kum 1982 khan Synod-in 'Eirukna do kum ' a puang a. Minute 5-a office tlai pawh Time Corruption, office atanga paper leh eng ilo tlemte In

International Anti-Corruption Day 2009 Report

lama hawn pawh corruption tho tiin kan inhrilhfiyah sak a, kan zuzi ral leh ta a. Minute 5-a office tlai leh office atanga thil tlemte In lama hawn kha kan buaina nilovin, kan buaina zawk chu a nuai tel a ni tih kan hre duh lova, tun hi kan thleng ta a ni.

Corruption hi Ram Hausa leh ram rethei te hmelma lian ber a ni. Tunlai khawvel chawkbwaitu hrang hrang, heng terrorism, global warming, insurgency etc te hi chhui tak tak chuan corruption hi a lo inphum leh nge nge thin. Ram Hausa leh retheite siamtu chu corruption bawh hi a ni. Engvangin nge an ni an hausak a keini ram hi kan retheih bik? A chhanna chu corruption hi a ni. Ram Hausa ah corruption a awmlo kan ti lo, corruption pawh nasa takin a awm ve tho. Mahse, keini'n corruption rahchhuah kan tuar ang em em hian an tuar ve tlat lo; a chhan chu corruption vang tho a ni. Corruption leh retheihna hi a inthlun zawm tlat kan ti thei ang. Retheihna hi corruption vanga lo awm a ni thei a; chutihrualin retheihna hian corruption a hring tel ve tho bawh.

Corruption leh retheihna in phiarzawm tirtu chu duhamna a ni. Duhamna hi mihring rilru a awmsa, a tha lama hman chuan taimakna leh thawhrimna thlen tirtu a ni thin. A chhelama kal tir erawh chuan chhiatna, ram hmasawn lohna, inrintawnlohna hring tu, chen hona boruak tichhe tu a ni thung. Hemi chungchang hi sawi thui deuh a tulin a lang.

Nitina kan hun hman dan theuh kan ngaihtuah a kan thlir let chang hian corruption vanga tuartu kan nihna zawng hian kan ngaihtuah ngai em. Engvangin nge tun thlenga power supply mumal tak kan la hmuh theih loh fo? Thutlukna siamtu politician-te'n thutlukna an siam dik tawh loh vang leh a kengkawhtu official-te'n an tana hlawk thei tur ang bera an bawhzui thin vang a ni. Nitina kan kalna thin kawngpui te hi engvanga thalo fo nge a nih? Mahni hlauh phuloha chenna In nalh tak sa thei leh a cheina atana bungraw man to ber ber nei thiam khan mipui te kalna tur kawngpui hi a siam tlo thiam tlat lo a nih hi! Tui harsatna kan tawh mekte hi corruption vang anih loh chuan puh tur dang kan nei lo. Kan nitin mamawh ngawih ngawih tak ngial hmuh kawnga harsatna kan tawh zo zai te hi corruption vang a ni a. Ram hmasawna tur ruhrel kan neih mumal loh chhante hi corruption vang a ni lawm ni.

India hmarchhak state a helna (insurgency) hluar em em chhan hi corruption vang a ni pakhat, a chhan chu political corruption (*politician ten vantlang/mipui that tlanna tur ni lo, anmahni leh an thurualpuite thatna atan chauha an thuneihna an hman sual hi political corruption a ni*) vangin hmasawna a kal

International Anti-Corruption Day 2009 Report

rual lo a, hmun tam takah chuan hmasawna hmuh tur hi a awmlo tho bawk; pawisa a awm tih hretu leh chung pawisa te chu a hmanna tur dik takah hman a ni lo tih hretu leh a tuartu tan chuan ngawi renga thut veng veng a har ngawt ang. Manipur a hel pawl hrang hrang te kalphung leh an hmalakna te kan en chuan corruption hrang hrang tuartu te an ni tih kan hre thei ang. Hetiang dinhmun hi thawk khat lai khan Mizoram pawh hian kan hlat vak lo a nih kha. Mipuite'n political consciousness an neih san viau a, corruption a nasat tho si chuan, leh administrative system in lungawilohna lo dawn sawna mechanism (institutional mechanism) a neih chhiat viau chuan mipuite lungawilohna chu peaceful demonstration ringawtah a tawp ngai tlat lo a ni.

Mizoram hi India ram state zingah 'most peaceful state' tia kan in chhalna hi sawi nghinin a awm mek tih kan hria em? Hemi chungchang hi corruption atang tho a lo in tan a ni tlat. Tuikuk, Chakma, Hmar te hmalakna hrang hrangte hi kan bihchian chuan hnam anga dinchhuah an tumna ringawt ni loin hmasawna a kalrual loh vangin mahni leh mahni in enkawl theih tura thuneihna sang zawk an ngiatna a ni tih kan hmu ang. Ram chhunga hmasawna a kalruallo thin lutuk hi corruption hrang hrang vang a nih si chuan a tuartu tan chuan chu ngei chu a slogan tur a ni tlat. India hmarchhak a North-East Students' Organization (NESO) Aw (voice) ti liantu chu 'The Indian Government has shown step-motherly treatment to us' (India sorkar hian nuhrawnin a fate a enkawl thin angin hmarchhak mipuite min enkawl) tih hi a ni. India sorkar chu nuhrawn nen an tehkhin a nih chu!! Hetiang deuh bawk chian Mizoram hmun danga chengte hi economic development lamah kan hrek ve em, kan inbihchian a ngai. Kan tihtur kan tihloh avanga remchang zawng rengtute hi Au-hla (slogan) kan lo pe reng thei a sin. Mizo National Famine Front (MNFF) atanga Mizo National Front movement lo irh chhuah chhoh dan te hi khatih hun laia Assam politician-te leh official te corrupt vang a ni lawm ni; kan ram an ngaihthah a, min enkawl thalo tih kha a ni lawm ni kan slogan kha?

Mizo society hi chhuanawm khopin a nuam tih kan hre theuh; mahse hei pawh hi corruption zung zam hian a eichhe mek. Kan awmna veng theuha an hlawh nena inphulo In leh Lo, Ram nei te kha han ngaihtuah ho ta ila, mibik tak an nih lemloh chuan an ina leng lut an tam lem lo tih kan hre thei ang; heng mite hian chhiat an tawh pawhin YMA nula leh tlangvalte an hip tam lo tial tial a ni; an hlawh phuloha an neih an In leh a chhung bungruate hi midang hmuh pui

International Anti-Corruption Day 2009 Report

an duh vak tlat lo. Mimal takin (individualistic) engkim an ngaihtuah tawh zawk avangin a huho a awm hlutna (values of community life) hi an ngaisang lo tial tial a. Chuchuan Mizo khawtlang nun, nuam taka thuitu (fabric) a tichhe mek a ni. Chutihrualin, vengchhung mipuite'n an lo ngaisang teh chiam biklo nen, amah leh vengchhung mipuite inkar chu a hla duai reng mai dawn a ni. Veng pakhata sorkar officer chu a In ropui tak sak bangah tute'n emaw 'He In hi ka eiruka ka sak a ni lo' tih an lo tar sak a, a thinrim khawp mai an ti. A rilruah 'vengchhung mipuite'n ka In hi ka hlawh atanga ka sak a ni lo tih an hria a nih hi' tih kha a awm reng dawn a, atan chuan tui taka khawtlang tana pen chhuah chu a har ngawt ang. Chuvangin, kan khawtlang nun nuam tak hi vawng nung reng tur chuan corruption hi hmelma lian bera kan neih a tul zual hle dawn a ni.

Corruption hi tih rem theih a ni lo vang, mahse kan titlemin kan hneh thei thung tih I hria ang u. Mihring rilru a corrupt chhung chuan corruption hi a awm reng ang, mahse a sawkhawk hi kan titem (minimize) thei a ni. Chu chu mipuite tel tam ve theihna (peoples' participation) zawnga sorkar hmalakna kan kalpui hian a ni. Peoples' participation hian transparency (langtlang) a ken tel avangin heti lam zawng hian sorkar hian hmalak uar se a tha hle ang. Dan siam turte hi Bill mai ala nih laite hian public notice siamin Dan siam tur chungchanga rawtna nei duh mimal/ pawl te tan an rawtna thelul hun siam sak thin ni ta se, a hnu lama buaina tur kan pumpelh fo thei ang. Kum 4 dawn lai kan hman hnuah pawh RTI Act, 2005 in a phut kan la tihhlawhtlin tlem zia te hi corrupt kan duh vang a ni mai lo'ng maw? Sorkar Deptt ten an website an update khat zia te hi zahthlak tak a ni.

Kum thar kan chuang kai tep tawh a. Nakum tan hian eng commitment nge ka neih ang tih ngaihtuah hun lai tak a ni. Kei chuan 'tuna aia uar leh zuala kawng hrang hranga corruption do' hi ka commitment tur a ni. Corruption kan do uar loh chuan kan tu leh fate tan eng ang society nge kan hnutchhiah dawn tih I ngaihtuah ho teh ang u. Mizoram hi ram nuam, lung rual taka kan lenhona tur, mitinte hlim taka kan inkawm theihna tur hmun atana siam tha leh tur chuan kan zavaia corruption kan do tlan hi a tul tak meuh a ni.

KA LAWM E

CORRUPTION LEH A HREMNA DAN

- KL Liana, Addl. Session & District Judge

Pu KL Liana hian paper a siam lo a. A thusawi pawimawh zinga kan lo chhinchhiah hman te chu heng te hi a ni:

1. Corruption ti te hremna Dan kan hman lai hi Prevention of Corruption Act a ni.
2. He Dan hmang hian kum 7 thleng lung in tan leh leichawi tir thlenga mi corrupt te chu hrem theih a ni a. Pawisa chawi theih zat hi bithliah a awm lo a, an pawisa tihchingpen hnem dan atanga chhut mai tur a ni.
3. Eiruk hi kan pawm tlang a ni ber lo maw?
4. Kohhran leh NGO lian ho hian thawhlawm leh buhfaitham khawn changin zu zuar leh eiruk hmang in an kalhlen ngai lo.
5. MLTP bawhchhia te hian anticipatory bail an la hman ngai lo a, Prevention of Corruption Act bawhchhia te hi chuan anticipatory bail an lo la hman leh thin.
6. He Dan (PC Act) vanga lungina khung hi Mizoram an awm ka la hre lo.

Annexure V

DISCUSSION THEME : CORUPTION I DO ANG U

- CHARACTERS :
1. Vanlalruata, President of Prism (Ruata)
 2. Lalrinzuala Chawngthu, Vice President (Sr) of Prism (Rina)
 3. Lalthuamlia, Vice President of Prism (Thuama)
 4. HK Liansawta, Treasurer of Prism (Sawta)
 5. RL Liantluanga, General Secretary of Prism (RLa)

Ruata : Vawiin December 9 hi UN General Assembly in International Anti-Corruption Day-a a puan a ni a. Hemi ni hi corruption awareness tisang tura hmalak nana ruahman a ni a. Chuvang chuan corruption chungchang i sawi ho teh ang u.

Rina : A bul tannan he ni lo irhchhuah dan hi mipui hriata sawi a tulin ka hria a. Kum 2003 khan Mexico rama Merida-ah UN General Assembly neih a ni a. Assembly hian October 31, 2003 khan resolution 58/4 of 31 October 2003 siamin December ni 9 hi International Anti Corruption Day atan a puang a. He Resolution vek hmang hian khawvel huapa Dan tlawhchhan neia corruption dona kawnga hnathawk thei tur hmasa ber United Nations Convention against Corruption (UNCAC) a din bawk a. International Anti-Corruption Day hi corruption leh UNCAC chungchang awareness tihsan nana hman tura tih a ni a. He ni hi kan la hmang ve ngai lo a. Khawvel ram dangah chuan an ram hruaitu lu ber ho meuh te in an hmang thin a, kan ram dinhmun thlir hian uar taka hman chhoh ve a tulin ka hria a. Hemi ni hian ram hruaitu te, political party

International Anti-Corruption Day 2009 Report

hruaitu te, sorkar mi pawimawh te, sorkar pawm pawl ten corruption chungchang leh corruption dona chungchang-ah hma an la ho thin a. Corruption Do Pawl te chuan chak zawka corruption do nana hma lain chi hrang hrangin hun an hmang thin a ni.

Ruata : Anti-Corruption Day lam kha i thlur bing zui ta mai a, UNCAC chungchangah khan tawi te sawi zawm tula ngaih ka nei a. UNO hian a member ram leh regional economic integration organizations te chu he Convention hi sign leh ratify vek turin a duh a. December 9, 2003 atang khan hming ziahhnan tan theih a ni a. July 23, 2009 thleng khan hming ziahhnantu (signatory) 140 awm tawhin India pawh a tel a. September 8, 2009 thleng khan hming ziahhnantu zinga 137 chuan ratify tawhin India erawh chu a tel ve lo a ni tih hi hriat atan a tha ve khawpin ka hria. Engpawh ni se, corruption chungchang sawi tawh teh ang u.

RLa : Corruption chungchangah sawi tul hmasa ka tih ber chu corruption awmze chungchang hi a ni a. Mizo te hian corruption hi kan inhrilhfiah siak rei tawh a, sim a hun tawh ka ti a ni. UNODC chuan khawvel pum pawm tlan theih corruption hrilhfiahna a awm loh thu an lehkhabu siam '**The Global Programme against Corruption – UN Anti-Corruption Toolkit**'-ah khan chiang takin an tarlang a. United Nations Convention Against Corruption pawhin corruption hi hrilhfiah tul a ti lo a, corruption huam thil hrang hrang ziahchhuah mai tha a ti a. He thu hi pawm mai a, ram hmasawanna tithuanawp thei corruption dona lama insawrbing mai hi a finthlakin a lang a. Corruption hian 'sorkarin mipui tana tha tura ruahmanna a siam tihhlawhtlinna kawnga Dan kal pela thiltih zawng zawng hi a huam vek' a ni.

Thuama : 'Sorkarin mipui tana tha tura ruahmanna a siam tihhlawhtlinna kawnga Dan kal pela thiltih zawng zawng a huam vek' tih i sawi khan diklo taka induhsakna te, thamna pek leh dawn te, chanvo leh hna pek dawna pawisa leh thildang phut chhuah te, mahni emaw duhsak zawngte emaw hlawk nana midang chanai pawh pen te, inthlan laia pawisa hmanga vote lei te, vantlang thil chhehrelh te, mipui pawisa chhehrelh te, hnathawh tur ruahman aia chhiaa hnathawh te hi a huam vek tih hriat a tul ka ti.

Ruata : Corruption tih tawngkam hi kan hman lar viau laiin Mizo tawnga a tlukpui kan nei hauh lo hi thil chhuanawm tak a ni a. Mi thenkhatin, "Japan ho chu an taima lutuk a, an tawngah hunawl sawina a awm lo," an tih thin ai mah hian 'kan tawnga corruption sawina awm lo hi a chhuanawm zawk' hialin ka hria a. Hei hian Mizo te hi hnam rinawm tak kan ni a, engemaw avangin corruption hian min tibuai rih mai mai a, kan hnam nun atang hian kan la paihbo leh thei ang tih a tilang chiang viauin ka hria.

Rina : Corruption chungchangah hian boruak a inthlakthleng nasa hle a. Kum sawm vel kalta te kha chuan corruption hi kan sawi sep sep ngam chauh kha a ni a, tunah erawh chuan langsar takin khawvel ram tinah kan do ngam ta a. Mizoramah pawh a ruka kan sawi sep sep thin kha kum 2006 atang khan langsar takin do a ni ta a. Corruption dotu pawl engemaw zat piangin chung pawl te hmalakna chuan nghawng thui tak a nei tawh a. Kumin 2009 kum laiawl vel atanga corruption dotu te do let tu pawl leh mimal lo awm ta hian corruption dona in nghawng a neih thui tawh zia chu a tilang chiang hle a. Corruption dotu te hmalakna avanga mipui sum chingpen tur fel taka kal leh ta te, pawisa kawngbo tawh a nihna taka hman theih tura lo chhuak leh te, leh corruption

International Anti-Corruption Day 2009 Report

avanga Dan hmanga man hial te pawh hmuh tur an awm ta a ni. Hetianga corruption dona leh duhlohna pung zel hian corruption pawh a tihlem zel avangin a dona leh duhlohna hi uar zawka kalpui zel a ngai a ni.

Sawta : Corruption hian ram hmasawna a timuang a, ram chhung mihring zingah inrinhlelhtawna a thlen a, politic khelphung a ti chhia a, chatuan hremhmuna mi tam tak a hnuk lut a, mi rethei leh hausa kar a tizau mai ni lovin dik lo taka hausa te chu an hausakna leh thuneihna hum zui nan hmanraw chhe ber thlengin a hman tir thei a, a lehlamah mi rethei te chu hmanraw chhe ber hmanga mi hausa te tihchhiat tumah a siam thei bawk a. Chutianga a nghawng chhuah china a pawh theih zia chu khawvel ram hrang hrang leh India ram state thenkhat te chanchinah chiang takin kan hmu thei a. Chuvang chuan mitinin mahni theihna zawn theuh atanga do a tul a ni.

Ruata : Pu Sawta sawi kha a thain a huam zau hle mai a. Chiang deuh zawkin corruption hian enge a nghawng chhuah a, engtiangin nge kan tuar theih lam sawi ve thung teh ang u.

RLa : Corruption nghawng hi zau pui puiin kawng li- political, economic, social leh environmental ti tein a thliar hlawk theih a. Politic khelhnaa corruption hian democracy leh Dan kenkawnna a tichhia a, ram hruaitu tha kan neih theih loh phah thin a. Economy lama en chuan corruption hian ram leh a chhunga chengte a tirethei tial tial a, mipui leh ram tana sorkar ruahmanna lian pui pui a tihlawhchham thin a, sumdawnaah rinawmlohna hring chhuakin inbumna ramah a ram chu a chantir thin a. Mipui vantlang nun (social)-a a nghawng hi rapthlak berin mipuiin ram hruaitu leh sorkar an ring ngam lo mai ni lovin mi zawng zawng inrinhlelhtawna a thlen thin a, chu chuan hnam inlungualna tichhiain intih tel telna a hring a, a tawpah phei chuan thisen hial a luantir fo a. Project lian pui pui ruahman leh thawka tihlawhtling si lovin awmze nei lovin kan chenna leilung leh thing leh mau nasa taka tihchereu a ni thinin kan environment in nasa takin a chhiatphah thin a ni.

Sawta : Mi pakhatin corruption a tih hi ram tan a pawh thui thei hle a. Kan kawngpui tha tak neih tur enkawltu tu in emaw corruption a tih avangin mipui nuai telin kawngpui chhe tak neih phahin kum tam tak hrehawm kan tuar phah thei hi a pawh a ni.

Thuama : Chuti ringawt a ni hlei nem, corruption titu mihring chu a thenawm khawveng te nena an inkungkaihna tihchhiat sakin mi anchhia a phurh tir teuh thei a; an inchhung khur ngei pawh damlai hremhmuna chan tirin corruption ti thei lova a awm veleh nun harsa tak a tawn phah theih mai bakah amah leh a chhungte thlarau chu chatuan hremhmuna a hnuhluh sak thei a; inthup nana kohhran a belh ngat phei chuan mi tam tak thlarau nun a vaw chau thei a, a pawh hle.

Ruata : Corruption hi ram tinah a awm a. Tun dinhmuna chuan Scandinavian countries an tih ho-ah khuan nep berin Sub-Saharan Africa ram ho-ah khuan a nasa ber a. Kan chenna India leh a thenawm ram ho- Bangladesh te, Myanmar (Burma) te leh Pakistan te pawh hi corruption nasatna ram an ni. Corruption hi political leader leh police ten an ti nasa ber niin zirchianna hrang hrangin a tarlang a. Zirchianna thenkhat political leader te hi corruption ti nasa bera sawi an nih laiin a thenah chuan police te hi corruption ti nasa ber nia tarlan an

International Anti-Corruption Day 2009 Report

ni thung a. An pahnih hian an indawt zel avangin a ti nasa ber ber pahnih chu an ni ngeiin a lang.

Rina : Transparency International India leh Centre for Media Studies in an buatsaih – 'India Corruption Study 2005 to Improve Governance' in a tarlan dan chuan an zirchian chin state 20-a public service sawm leh pakhat chauha mi vantlangin thamna an pek belhkhawm chu Rs 21,068 crores a ni a, mi pawimawh china thamna pawisa leng vel chu hemi let thum aia tlem lo tur hi nia ngaih a ni a. An mi zirchian zinga 62 percent chuan thamna an pe tawh ngei a, hmun li-a thena hmun thum te chuan corruption hi zual zelin an hria a. He zirchianna in a huam chinah chuan Kerela-ah corruption tlem berin Bihar-ah a nasa ber thung a. Corruption lo awm chhan pasarih nia he zirchianna in a tarlan te chu : transparency leh accountability awm tha lo te, corruption report-na awm tha lo te, sorkar official te rinawm tawk loh vang te, intham hi nunphunga kan neih tawh vang te, Judiciary that tawk loh vang te, economic policy tha awm loh vang te, leh sorkar hnathawk te training leh orientation neih that loh vang te an ni.

RLa : He zirchianna hian Mizoram a huam ve lo a. Keini pawl PRISM in Mizorama corruption nasat chhan bulpui pathum nia kan ngaih ve thung chu - mi corrupt-ten Dân hremna an tawh thin loh vang te, kan politic khelh dân that tâwk loh vang te leh kohhran leh NGO tam zâwkin corruption kan pawm vang a ni thung.

Ruata : Hawh teh u, a tihbo theih dan tur lam sawi teh ang u. Kan ram atanga kan thlahtu te hriat ngai loh corruption umbo nan hian kan zavaiin mawhphurhna kan neiah ka ngai a. Sorkar te, sorkar hnathawk te, kohhran leh pawl ho te, khawtlang roreltu te, leh mitin hian hma kan lak a ngai niin a lang a. Tawi te tein kan tih theih te chu i han sawi teh ang u.

Rina : Corruption tihbo nana hmanraw tha leh awlsam ber tura ngaih chu transparency a ni a. Tihhlawhtlinna atana tangkai ber tur erawh chu political will a ni thung a. Huapzo taka sorkar hmalakna kalpui te, planning, implementation leh monitoring-a comprehensive approach neih te, tum mumal tak nei bawk sia a tul anga kalphung thlak theih te hi hmanraw tangkai ber ber tura ngaih an ni a. Corruption chhui leh a titu hrem hi thil tul tawpkhawka ngaih a ni a, a chhuitu agency leh judicial system tha neihna ramah corruption a tlem bik tih Transparency International chuan a sawi a. Thuneihna sem zai a, local body te leh official zawng zawngin mawhphurhna leh thuneihna chin bik neih hran thliah hian corruption a titem theia ngaih a ni a. Hna lian tham thawh te vil zui a pawimawh a. Hnathawk tha te lawmman siam sak in kawngro a su thui thei hle bawk a. Kohhran leh NGO kan tih ang chi te an harhchhuah a, sorkar an tanpui a tul bawk nia ngaih a ni. Corruption dona kawnga inhmang te venhimna tha pek a tul a, USA-ah chuan United States of America, Whistleblowers Reinforcement Act 1998 neiin Australia-ah chuan Australia Whistleblowers Protection Act 1994 an nei tawh daih a ni.

RLa : Kei ka ngaih dan chuan sorkar hian langtlang leh rintlaka hna thawkin Right to Information Act hi anih dan tur takin kalpui se la; a inrelbawlna ruhrel leh kalphung hi corruption titem zawngin siam tha se la; Vigilance Commission dinin Anti Corruption Bureau hi thuam tha se la, judicial system hi tiphuisui se la; a hnathawk te enkawl leh a hmalakna kawng tinrengah Dan angin kal se la; thuneihna leh mawhphurhna semzai thiam se; zirna school-ah hian corruption that lohzia inzirtir ni se; corruption chungchangah public complaint mechanism

International Anti-Corruption Day 2009 Report

tha siam chhuah ni se; hmasawanna tura ruahman project uluk taka siamin tha takin vil zui se la kawngro a su thui hlein ka ring.

Sawta : Kei chu sorkar hnathawk te hian an rilru puthmang thlakin Pathian tihna leh ram hmangaihna nen dik takin hna thawk se la. Anmahni leh an tu leh fa te tan ram dang an nei lo tih hre thar se. Zahawmna hi mimal hausakah inghat lovin ram dinhmunah a inghat a ni tih hre thar se kan that phah thui viau in ka ring.

Thuama : Kohhran leh pawl kan neih sa te hi sorkar khalh ngil zawnga hma la turin piangthar hlawm i la. Kan pawl tana tha tur kan buaipui thin hian ram tan thil tha lo a nghawng chhuak thei tih hriain kan rilru puthmang thlak ngam i la kawngro a su thui hle lo ang maw?

Rina : Khawtlang roreltu te hian dik taka ro relin sorkar hmalakna tihlawhtling turin inpe zual se la. Mimal tinin rilru thar puin sorkar hmalakna leh vantlang thil te hi taneih nachang hre thar i la; chanchinbu mi ten investigative journalism uar se la hma kan sawn thuai ang tih ka ring tlat a ni.

Ruata : Engah nge he corruption, kan hnam thil pawh ni lo hi kan umbo theih loh ang? Kan hmel ang pu mi te chenna Hong Kong khi kum 1970 chho thleng khan khawvela corruption nasatna berte zing ami a ni a, kum 1974-a Independent Commission against Corruption (ICAC) an din chhuah a, thuneihna leh hmanraw thaa an thuam atang khan hma sawnin tunah chuan corruption tlemna hmun a ni tawh a. Malaysia pawh khi 1967-a Anti-Corruption Agency (ACA) din a, Dan tha tak leh thuneihna sang taka thuam anih atanga hma sawn tana tuna khawvel awrawn ram lo ni ta a ni a sin.

RLa : Corruption do tur hian kawng hrang hranga hma lak a ni thin a. Cambodia-ah chuan school zirlaiah corruption thatlohzia inzirtirna an telh tawh a. Italy-ah chuan corruption laka mi fihlim leh corruption dotu te zirna school-ah kaltir in zirtirna pek tir an ni a. Macao-ah chuan primary zirlai-ah telh a ni a. Uganda-ah chuan chanchinbu mi te training pek an ni a. USA-ah chuan zirlaiah telh a ni a. Zambia-ah pawh zirlaiah telh a ni.

Ruata : Corruption umbo tur hian hun tha tak kan nei a sin. Right to Information Act neiin kan duh apiang kan hre thei tawh a. Kan RTI hi US leh Australia-a an Freedom of Information Act te aiin a tha zawk hialin a lang a. Hei hi kan hman tangkai thiam phawt chuan corruption hi kan veng thei dawn a. Chumai bakah corruption do tu te thiltih leh chanchinbu in corruption chungchang a ziah te hian sawimam dan zawng lovin a mawhpurtu zawngchhuak leh a tul anga action la zawngin sorkar hi kal char char se la kan thachhuak leh mai ang. Hawh u, kan theihna zawn theuh atangin kan tawng pawha awm lo, engemaw avanga min tibuitu ni rih mai mai corruption umbo tur hian, he Anti-Corruption Day atang hian nasa lehzualin ke i pen theuh ang u.

International Anti-Corruption Day 2009 Report

Annexure VI

Sorkar thuchhuah: International Anti-Corruption Day chungchangah hian Mizoram sorkar-a Information and Public Relations Department chuan hetiang hian thuchhuah a siam

No.1892/2009

INTERNATIONAL ANTI-CORRUPTION DAY HMANG

Aizawl 9th December : People's Right to Information & Development Implementing Society of Mizoram (PRISM) huaihawtin International Anti Corruption Day chu vawiin khan Aizawl-ah hman a ni a. Hemi pual inkhawm buatsaih chu I & PR Auditorium-ah Mizoram Larsap Lt. Gen. (Rtd.) M.M. Lakhera, PVSM, AVSM, VSM chuan a hawng.

Governor chuan hlemhletna corruption hian mi zawng zawng a nghawng vek a, chuvangin tu berin nge do ang tih chu zawhna awm thei tak a ni a ti a. Sorkar-in dan leh hrai tam tak a zam te hi dik taka zawm chuan hlemhletna dona chi khat a nih mai lai hian zawm lo leh palzamte chungga hremna lekkawh a ni lo fo hian corruption kan tih hi a ti punlun a ni thei em tih te chu zirchian ngai tak a ni a ti a. Mizoram Budget tarlangin 2007 ah khan Budget chu vaibelchhia 2602, 2008 ah vaibelchhia 3199 leh kuminah vaibelchhia 3206 chuang tiin hei hi Mizoram mipui zawng zawng nausente nen lam chhiar tel pawhin mi pakhatin Rs. 2500 zeta sem theih a ni tiin heng sumte hi a hmanna tur dik taka felfai taka hman a nih chuan hmasawna namenlo hmuh tur a awm ngei tur a ni a ti. Khawvel pum huap ni bik hi Mizoramah pawh mi thahnemngai ten hman an rawt hi thil lawmawm tak a ni a. Hei hian corruption do kawngah zirtirna tha tak a thlen ngei ang Larsap chuan a ti.

He huna thusawitu dang Chief Vigilance Office leh Chief Secretary Pu Vanhela Pachau chuan hlemhletna hi tumah hian kan do phal tak tak lo a ni em tih hi ngaihtuah tham a tling a ti a. Hlemhletna do tak tak tur chuan chan ngam (sacrifice) a ngai a ni a ti a. Bank sum puk rulh that duh loh nghawng pawl zia uar takin Pu Vanhela hian a tarlang a ni.

He ni pual Inter College Elocution Competition titha te hnenah Governor hian lawmman a sem a, lawmman dawngtute chu pakhatna J.H.Lalmawizuala, Hrangbana College, pahnihna Lalfakzuala, Govt. Aizawl North College leh pathumna Zoramthanpuia, Hrangbana College te an ni.

Seminar hawna hi Pu Denghnuna IAS (Rtd.) in kaihruiin PRISM President Pu Vanlalruata bakah political party hrang hrang aiawhten thu an sawi a. Chawhnu lamah seminar a chhonzawmin mi thlanchhuah bik Dr. JV Nunchunga, Pu Lallianchhunga, Rev. Rosiamliana Tochwawng leh Pu K.L. Liana ten an thuziak chhiar chhuakin sawihona hun hman a ni.

ztk/mz